

緣督廬日記抄

緣督廬日記抄卷十一

甲戌癸卯至
長洲葉昌熾著

邑後學李烈輝

癸卯正月

元旦 萬壽宮朝賀行禮畢謁 文廟歸署謁三聖宮土地祠
祭竈神拜影堂

初二日燈下作七律兩首賀崧帥

二十日吳泰伯生日江南館治觴祝嘏並集同鄉團拜席將散
方伯紀綱持朝報來去歲彈章出王聘三侍御奉 旨安徽
捐納試用同知何厚彭著交部議處而方伯則加 恩免議
天恩高厚崧帥一言亦重於九鼎已

廿二日前月所遞附片奉到電傳 諭旨山丹縣教諭苟萃珍
金縣訓導謝邦彥均著賞給國子監學正銜新量迪化府教

授巨國桂賓給內閣中書銜莊浪縣學訓導張宸樞因素婪索不知遠嫌秦安縣訓導謝敬熙行止卑鄙不堪司鐸均著即行革職

廿九日日前在浙館沈少節遞數隴上石刻今日饒拓本一包其所謂黃龍碑者即面狹頌及五瑞圖也涇州田山王母宮雜刻二十餘通惟嘉祐張揆題名尚可著錄敦煌學宮古碑兩紙籤題索靖碑發視通一碑兩面刻其陽唐□□都督楊公碑年月諱字已泐其陰歸義節度使索王裕碑景福元祀立篆額皆完好孫趙未錄南北亦從未見拓本一變已足度隴以來墨林第一快事

二月

初一日明日上丁 文廟行釋奠禮省例崇聖祠學政主祭夜

丰先行禮祭器僅有爵尊蓬豆之屬皆不備亦無樂舞雅禮生引贊及鼓吹喧闐而已

初二日午初出東關送恆將軍非話別也省例大員入都護臣寄指 聖安學政以下皆隨同行禮所謂從宜從衆也政務處咨到第三次特科名單吾鄉曹再韓吳穎芝李橘農夏閏枝均為壽州相國所保君九又入南皮刻牘

初三日循例謁 廟歸即放告洮州廳紳士包永昌等公呈訐前署教授陳炳新擅伐大成殿樹木並種種劣跡包已丑同年作令粵東有循聲其言當不妄蘭山書院肄業生公呈為碾伯縣革生鞏躍龍請開復此案因姑畧其婦致死該生係婦之昆季碾伯縣朱頌青大令有左袒以不服相驗詳革都人即不愜于衷手批其牘云人命至重該生雖咎有應得而

姑惡之聲亦不忍聞名分恩義兩者並重想賢有司自能持其平也不平則鳴無怪諸生之嘖有煩言也又狄道州康生劉乾稟呈觀風奏一本稱榜發無名追問書吏在廢麓中檢出適前日洮州廳教授薛度芷續賣到兩本申稱去年八月即已呈學半年之久不知前署任何以置若罔聞所捐前署任者即陳炳新也視其奏雖非佳構在此間尚為中乘因並閱之懸牌以兩本附正取仍各獎銀一兩一本附備取狄道州學正劉觀恩前署洮州廳教授陳炳新均各記大過一次書吏飭學責懲庶寒咬得免向隅而官吏知所警惕

十四日批閱公牘階州張鑄江刺史詳請將革生汪勳鎖帶鎖桿三年該生強橫滋事怙惡不悛加等治罪在所應得惟究富為士類稍存大體拘吏云前此曾有成案經督署批准然

鄙人終未敢與聞也

十九日閱求古卷畢第一鎮原劉北庵諸卷聚訟皆先有一中西之見橫互胸中惟劉卷事理通達心氣和平下語皆有分寸顛撲不破以此拔之

廿一日已刻自省署起馬出西門沿雷壇河行三里沈家坡東為四墩山西為華林山雖土阜頗高峻自五里鋪八里窰十里鋪紆迴行五里升龔家厓兩厓之間溝塍綺錯官路沿溝曲折崎嶇流泉如織兩厓斷處上橫木梁以度行人輿出梁下有如甕門遠望亂山層疊殘雪在頂又五里二十里鋪茶尖又二里花寨子又五里清水營又五里果園遠望山嘴有神廟又三里峴口子羣山至此一束危峯當路高出青冥兩峽間窄徑回環下臨絕澗泉聲潺湲怪石嶮醜山行五里兩

山之間有聚落名阿干鎮人烟輻輳居民皆以陶為業瓶罌
羅列頗似吾鄉之橫塘鎮即宿行館今日共行四十里時未
加申得詩二首

廿二日卯初發阿干鎮出堡有層樓立曠野中四面皆窗牖富
以彤家言而建沿西山麓行重巒疊嶂迤邐不斷山高遶窄
冰雪滿塗五里大楞干又五里和尚鋪小有邨莊又五里溝
窩于土巷甚窄由此登關山嶺偏仄屢屢盤旋而上將臨嶺
脊危梯絕陡五里至絕頂有邨居十餘家停輿稍憩四望遶
澗惟見羣山環拱如屏阜下嶺初級尚平夷稍行益陡削冰
雪交融淙淙白山腰直下塗泥滑達重足屏息而行五里馬
圈溝山勢周圍如栲栳中央稍平曠又五里扁坡根又十里
白崖驛過此為沙泥州判界僕從在此換馬驛北皆土山栽

石自驛而南則石壁森立稜稜露骨間有藤蘿縈繞皆作蒼
紫色又五里關溝口出溝平曠村居斷續又三里上中鋪又
五里下中鋪尖入城閘閱其門額曰湧泉堡飯後天驟熱行
十里紅峴兒沙土鬆浮飛塵隨馬足而起登白土坡升降十
里始下坡又五里王府莊又五里抵沙泥城城一土堡耳僅
有文武兩署村民皆環居城外一入城閘即望見署門洞開
而居即別駕上房甫卸裝傳別駕入見謙言地瘠官貧供帳
菲薄及晚餐肴饌精潔居然南味過武威張掖遠矣今日共
行八十里得詩一首

廿三日卯刻發望南行土道如深巷約行二三里傳子允在道
旁送別出峽一土山崔嵬突起橫亘當前宛如障壁折而西
又折而南豁然開朗兩山之間良田曠宇溝塍綺錯山壁含

卯石累累共行八里至朱家窰始有人家又二里沙橋又五里太史鋪街長一里許又五里水泉子又五里裴家灣又五里新店子尖所經三十里鄰居栢比街字相望黃童白叟環繞車下每至一邨皆換驢邨民趨之如鶩若甚樂于從事者過此為狄道州界署狄道州張若金號紫泥陽湖同鄉自州城來逆見予行館云前三日得雪深遠豐壤有兆宜父老欣欣然有喜色也行館對面遠山環峙山頂穰苔如繡屬土色斑駁遠望如紅牆碧瓦亦如小李將軍金碧山水飯後行五里韭菜灣又五里康家莊又五里劉家溝口田廬皆現白色如霜蓋亦饒地之新闢者道路稍崎嶇人烟亦漸寥落又五里新田鋪亦有邨居約數十家自此南行二十里十里一鋪第一鋪北為劉伶溝南為黃毫溝皆相距五里劉伶轍跡未

嘗度麓不知何以得名又五里苟家鋪離城僅十五里矣自城計之八里一鋪五里一鋪進城至州廨停驂楊椒山先生曾為狄道州吏目廳事院壁有其石刻築亭庇之今日共行九十里皆平路得詩兩首

廿四日卯初出狄道東門羣山繞郭超然書院即在南山之麓毗連有焦山寺樓閣深邃參差入畫諸生送于郭外二里渡東峪河過五里鋪十里鋪又二里路南有大石張家又八里二十里鋪東行三十里一鋪四十里一鋪又五里潘家河灘又五里蜜店尖自出城後南北兩山迤邐環拱中間地勢寬廣平沙枯草有似圍場山巒潑翠壁如渥赭靚川縹野霞駁雲蒸道旁間有喬木虬枝鐵幹尚未放青飯後行五里徐家鋪一河前橫沿土阜折而右從斜徑行山石葦確藤蘿貫足

捫壁拳曲而行又三里余家河灘又二里黃家灣循澗而行
澗兩旁一綫羊腸徑極窄叢木灌草碎石深坑後逼峭崖前
臨坎窩拔棘覓路忽東忽西澗流斷處皆支獨木為梁以渡
五里苟家河灘又五里石板溝門澗中浮沙凝結宛如鐵板
泉聲汨汨鳴沙底如彈箏又三里康家店至此始見草屋三
四家又五里蕭家鋪又二里清平茶尖入渭源縣界稍憩即
登山行五里至山麓有邨市土人謂之坡底邨山勢廣袤上
下四十里螺旋百折故自下望之極高峻而升降不覺其前
方十里一杆旗有汛房駐守又五里曹家峴已近絕頂四望
羣山層疊如湧波濤惟見來時一綫路曲折如修蛇此外絕
無平地隴坂層鋪丹梯百級土人於山凹皆墾闢為田魚鱗
交錯盡成方畝宛如隴東路上一承差攀輿指點兩山間雲

際最高一峯謂即烏鼠同穴山其尾渭水所出洸源一山亦在其旁不覺首肯又五里過釐金局自此循山而下即望見後河亭如在屋下據導者云不過五里繞曲行十餘里始達至此始履平地又五里進渭源東門至行館今日共行一百二十里得詩六首

廿五日卯初發渭源出南門渡渭水三里源根下峯巒奇秀松栝成林又七里單家泉又五里喬家鋪實大令淪茗送別在郵店談極久據云邑中文廟燬于兵燹官地有五竹山喬木千章其材可資大廈已鳩工矣所餘尚可建蒙塾又有罰錢可購書籍資絃誦又云烏鼠同穴山距城十二里前此修通志時曾派員到山目驗至今總總尚同穴又五里劉家大路出渭源界入隴西界又十里上下雙輪磨又五里山河口山

勢寬廣田疇沃衍築有土堡兩座雁行立又五里沿首陽山麓行山下為董家鋪路南有石碣題有商逸民伯夷叔齊墓道旁又有短碑一座未及下車讀表齊稿餞在晉境此間不應有其埋骨處殆出附會耳又五里首陽城尖在行館見祁大令鞏昌府知府林星賡十五日折悼亡遺稟請假並派祁大令代辦提調事首陽城距郡城四十五里行二十里為亂泥灘灘之西五里為三十里鋪其東二十里一鋪十里一鋪進西門至貢院貢院舊為回民禮拜寺同治間回亂削平後以此歸枋

廿六日忌辰休息一日作林太守夫人輓對一聯佐成蔭本清風澤沛節愓度麗循聲資內助修到梅花仙春魂歸紙帳還鄉遺挂勸長離

廿七日辰刻謁 廟講書

三月

初三日通渭西和洮岷及隴西鄉學童正場岷州番僧丁哈口
住逸稟許文童喬國南之祖曾在寺中司香火不當應考並
許學官康保受賄即牌示云釋氏平等豈有主僕之分佛教
觀空當以爭訟為戒况考試為國家大典豈容僧徒干預原
稟擲還并飭襄在都中觀劇名優揚三演勢僧稱擅場不謂
此間竟有徐小樓也

初七日此間稀姓寧遠有亂歹其鞭鞭之裔數又有里東令姓
令為大族伏羌有頡姓亦大族又有門尉二族尚為中國古
姓洮州有敏岷州有於暢祿皆不經見

初九日辰刻發落生童畢夜束裝

初十日已刻出東門二里至春場過七里鋪又三里爲家坪又五里屈家溝官道在兩山間又五里二十里鋪右山之麓有白塔七層凌空高揭又五里安家門又五里三十里鋪又五里土店子入一土峽右繞山麓自坡而下仍現平敞地又五里至四十里鋪宿行館倚北山之麓對面峻壁千仞上有土城山腰開竇如蜂房遙望無徑可攀不啻梯巢牆後亦有土園子高路山半正壓鳴吻之脊途次所見土堡共三座皆倚山畚築高峻堅固環堵百雉宛然巖邑但僅如斗大耳所居破屋三間上覆茅皆洞穿簷深墻峻不見日色與中重裘汗出入室覺陰森之氣砭人肌骨即命爇爐火禦寒

十一日辰刻啓程東行一里餘渡渭河河在兩山間皆平灘水從窪處行流甚駛共涉水三道支雙木爲梁輿夫不能渡用

民夫八人脫屣扶輿徒步而過共行六里至麻黃溝入寧遠界換夫馬又四里解家坡又四里蘭家坡自坡而下一硿中分兩厓土牆斷缺如贅叢甫闢者此十餘里中山勢如長蛇不斷往往北山盡處南山如環而轉蜿蜒東趨橫列馬首如屏遠望亂峯層裏無路可通及行近則山峽中如環缺處別開天地又六里趙家根子知寧遠縣事周森章自城來迺至行館茶尖稍憩行五里磨石峪又五里鴛鴦嘴一高坡當路突起上為平地有邨舍數十家西坡下為渭水所經東坡下為漳水所經自坡而上渡渭水自坡而下渡漳水北面羣山中有羊腸一線可通秦州光祿山高插雲際已在馬首矣二里登山螺旋而上山半有神廟土垣繚之絕頂中開一隙兩畔土屋卓立由此而下山勢頗陡曲折沿山壁繞道亦較登

山路為紆曲三里至平地為車家岸停輿小憩脫羊裘易鼠裘自山而東南北兩山畧為平遠沿山丹河而行五里有市集過何家店子兩邨皆在山麓衛宇相接又五里登一嶺為青林峪始見額牆內紅杏一株枝頭已爛漫矣牆間多種瓔珞柏憧憧如車蓋宛然故鄉風景又五里石嶺上望見城郭在山坳中道旁見短碣三四通未及下車請又東沿絕壁行升降坡陀山路甚窄達嶺斷處共過土橋兩座五里至寧遠城渭水流其下澎湃有聲西郭外河灘石瑩瑩皆紫色磐石四五如案如臼其色深青鮮瑣如龍奔流激其上與紫石相映發上觀蔚藍奇巖目所未觀幾欲下米顛之拜進西門至縣署停驂臥室在柱笏樓之下少憩見周大令己丑同年陳戶部廷鑑在此間掌教來拜亦見之即出署答拜陳同年住

東門外城闌在山坡之上憑高俯矚城中瓦屋鱗次瞭然在目蓋此間未遭兵燹故民居轉較肇昌為稠密搭周大令云此次新進第二名林生之祖當回匪至鉤稽斷絕毀家紆難城賴以全功在桑梓宜其後起之克振也今日共行七十里署門外有康熙十一年招地墾荒碑雖非古碣石質堅瑩如玉夜與介侯秉燭往摩挲之

十二日辰初出東門過五里鋪又五里鄧家街子又二里下街子又五里高橋一土橋耳覆以長廊兩面皆紙窗如行屋裏又五里孟家莊又五里孟馬包里又五里樂善鎮一名樂門周大令送至此烹茗話別市盡處郭氏引渭水為陂作水碓其上輪轉如飛激水聒耳共踰三溝走木為梁枕湮而渡又二里過小樂門三里劉家墩皆礮灘又五里周家莊入伏羌

縣界亦皆斥鹵兩縣留為甌脫寧遠夫役至此交替又五里解家坪知伏羲縣事吳寶琛自城來迂又五里磐安鎮在關帝廟尖鎮距城五十里飯後行十里為四十里鋪又五里楊家大莊又五里三十里鋪又三里朱園嶺即為貢所謂兩傾朱園是也羣峰如波濤涌出絕壁森立赫如瀝丹山半皆崖然突起如頽墻中空而鼓其腹峻極不可攀援一陡崖之下磐石外向形如覆釜亦如半塚上構殿宇然皆無路可通鑿墻為穴以容趾今日所行皆坦道峯巒環拱邨落相接至此則山勢漸合渭水出其間湯湯分道流槽中最寬者約十丈許皆新樹極填土為梁凡涉三水行七里而至二十里鋪又五里馬務寺又五里十里鋪渭水之濱朱園之麓遠望紅關碧瓦神宮梵刹時時隱現亦有結屋山棲者雞犬之聲遠在

雲際炊烟縷縷自巖竇出又五里經大像山山麓有大像寺
其前當路為魁星閣壁上有短碣朱書義皇故里四字由此
而登伏羲臺又有殿祀夏禹最後一殿倉頡與周文王並祀
亦有洞賓菩薩諸像蓋合儒釋道而為一者也大佛在山半
絕壁鑿石為軀自正定而邠州而山丹所見大像積薪居上
此像尤偉麗即山壁鑿石閣四層以容之閣之前僅一綫地
下即深厓繚以朱欄從下望之了了在目余本有登山之約
至此環而觀者如堵墻又有官吏周旋遂至可望而不可即
疾趨而過介侯往游歸述所見如此又五里進伏羌城西門
烟戶殷賑與寧遠相伯仲亦以縣署為行館所居室後闢小
園梨杏正放喬柯修竹頗擅幽勝壁間懸幀皆吳大令自臨
六朝碑筆法秀挺似龍藏寺非俗吏也夜作五古一首今日

共行一百里

十三日辰初發伏羌仍自西門出折而南行即發一小坡左為龍神廟右有四碑惟見一碑題蜈蚣堤三大字當是頌前令尹宣房之績者官路兩旁危峯壁立高峻雄偉石罅時通一綫有似狹巷山勢迴環如之字路隨峯轉共十里至渠家莊有新生拜于輿下又五里路愈窄亂山當道前行無路從東山登坡梯級懸峻二里田家灣又三里峴口上有邨居三四家稍趨而下復上升曲折行十里至松樹灣是即三十里鋪已臨絕頂下望隴坻層接方界參差羣鴉嘯草其上白者如甕面浮蛆蠕蠕蠢動黑者如陶甕一點吳大令先驅至此淪茗以俟即下輿話別良久自此下嶺山徑益陡與人疾趨而下勢若轉丸五里入秦州界又五里至山麓為闕于鎮市井

駢闐視慶陽郡城殆過之至關帝廟尖潘謝兩君以遊大像
寺久不至與介侯子沂先飯即行渡南河遇碣石灣五色石
鋪地如錦繡大者如鼓如臼小者如拳排色者尤鬆脆落屑
霏霏儼如花片闕子鎮距秦州八十里十里一鋪皆有墩臺
所至汎舟懸旂其上鳴鐸以逐客共十里至七十里鋪經大
石嘴右邊一山至此而盡山嘴突出左山曲行來會中通一
徑又十里為六十里鋪自此十里至西陽口即五十里鋪中
間為散人場由鋪而西過何家城子又十里至四十里鋪南
山石壁之上有小閣兩楹雁行矗立方平如砥窗牖洞開遠
望白壁上似畫李鐵拐像懸厓峻絕下無梯級不知其何以
上也又五里黃家灣又五里三十里鋪宿以養正書塾為行
館今日共行九十里自鞏昌東南所見山地非石壁皆開墾

成田即至陡削孤懸之處高高下下亦疊比如魚鱗可謂地無遺利矣吳筏僧云但得冬春間兩度雪即可播種

十四日辰初發循來時路西行出鋪折而南沿山麓途漸窄山徑蹊間碎石斑斕目迷五色紫者濃如玫瑰碧者黠若瑯玕惜質甚粗紋理瑩裂僅如碎甕行稍遠漸有大石如磐有純白者頗瑩潤如白蠟離色者其斷裂處亦現白紋或浮面一層如凝霜山麓皆蓋小屋安水碓遠望參差如亭榭居民引山泉漱而上淙淙倒流宛如瀑布巖壑頗資其點綴三里廐家溝林木深處有邨舍泉聲山色塵囂不到令人慨然遐想乃此中人聞高軒過皆疾趨出視冠蓋殆所謂交相羨者非邪自此而南山高路窄石壁奇峭嵐霏欲滴七里任家堡又五里至華林山麓南望兩山缺處羣峯隱現由東山升坡拾

級而上其山東西橫亘構長而狹有似一綫長隄人行絕頂如登翬背左右望南北羣山高下窠窠如波濤涌地而出山路紆折忽在山南忽在山北皆一面懸厓一面倚壁狹處不容旋馬適大風起砉鉤之聲聒耳前後不相聞與帷軒軒欲舉共十里始下山為鄧家溝門又十里牡丹園尖在省聞甘南饒沃牡丹園三字尤膾炙以為名勝之區及下車則一廢剎臨街三楹頽墻朽柱破爛不堪前面敗扉兩扇中空無闔後面一旁門通厨竈司茶司爨者絡繹不絕與露處田野何以異不覺索然興盡掃除土炕畧憩即行二十里至豐裕川又十里海頭入西和縣界促者於此設茶尖苦無駐足地畧停輿即前進十五里至高樓子自飯後所行四十五里頗平坦惟邨舍寥落田隴硤瘠風狂不息下帷假寐途中形勝未

能領畧但覺兩旁山勢平行無奇峯峭壁又五里陳家磨民居稍密東山之麓有兩土圍截然四方小而峻整又十里至鹽官鎮由東門進民居梯比列肆整齊約長里許聞南門外有鹽井鹽利甚溥一月收稅三百千以義塾為行館在西門外今日括路程單共行九十里實則一百二十里尚有奇十五日辰刻發出西門南行即望見兩山中間一土山離立其形嵒長上平如砥儼如人布肘而舒其掌共三成約高數十丈行十里王家城前臨一河兩岸相距不甚寬畧如城濠已濶為平田矣涉河而南登坡右沿土壁時有斷續斷處皆填土為橋三里毛家莊又二里趙家莊皆曠野不見所謂莊也又二里始至土山下土人呼為祁山堡武侯北伐六出祁山即此上有武侯廟諸葛大名垂宇宙宗臣遺像肅清高簡書

迫促竟未能登山瞻謁讀史尚友之謂何愧此行矣自堡下
折而東有河灘如廣場河流一道出中間渡河登坡南山橫
亘馬前如長蛇東西兩面山盡處樹林岑蔚皆有塗徑可通
沿山東行即望見山麓如尾漸逶迤至平地八里已家莊又
五里至山麓為禮縣界而長道鎮已在前矣以關侯廟為行
館兩楹懸帖以威並祁山功同柏寺對近臨柳鎮遠控鸛亭
鄉鎮鸛亭當為此間故實惜行篋無書以證之飯後行五里
新莊街市由東而南一縱一橫如丁字式烟戶不減長道鎮
過此又為西和界蓋此三日內二百餘里兩縣境壤犬牙相
錯今日禮縣尖西和宿明日即為西和尖禮縣宿訪云東家
吃飯西家宿真有此景象又五里礪兒莊亦名川口又五里
劉家河壩鄉民引水為兩溝中間土道頗坦直如長堤東西

兩山漸趨而合青嶂削立蔥蘢奇秀巖麓水確澎湃之聲不絕東邊一山脊突出石質微赭巖瘦有波浪紋循壁而過路極窄五里為王家厓過腰子坪又五里經劉家牌坊兩坊左右卓立規模整麗當是兩面有字從北視之一為義著貞恆四字一為有操必堅四字殆村學究所為也南坊下一土園高峻如城中闢閭閻男婦出而聚觀知其中有巨宅也又五里至石包城茶尖並無城堞一村落耳亂峯環列西山左折而南高插青冥通為屏幃稍憩行二里廟兜山又三里下寨子又三里上寨子下寨在街東上寨在街西皆極完固寨外民居亦相接又二里十里鋪又五里葉家莊一路人烟稠密每至一邨輒有諸生謁道左詢之皆此次科進新生西和學額不過十名然則此間為邑之鄒魯矣貞節碑亦林立丹青

巍煥又見兩碣一額題海人不倦一額題澤並河汾江漢秋
陽之暮猶見于身後亦古道之可風也又五里西和城城在
山麓喬木陰翳自外望之不見雉堞徐大令迂于郭外進南
門以漾源書院為行館門內左右列齋舍中為講堂又進為
掌教臥室高敞潔淨適逢假歸故暫以留客介侯子沂游城
隍廟歸云有宋紹定后土壇碑即屬徐大令拓之

十六日辰刻出西和北門向南行途尚平坦五里一鋪東山上
為吳家窰西山上為馮家窰至十里又一鋪兩鋪郵舍皆數
十家峯巒四合南望路家山在衆山中排空而出又五里登
崖循山腰折而東又五里避風灣即二十里鋪前橫一溝溝
上有橋橋下為墩臺其地深藏山腹萬山層疊圍如屏障避
風之名或以此又五里二郎壩南北兩山絕頂皆有土圍南

山為火燒寨子北山為果旂寨自肇昌以南所經山頂往往有城堞甚完固望之寥寥不見人烟頗疑土人築以避兵憑高據險可以固守也又五里紅嶺山始入峽登山不甚高僅百餘步即造絕頂自嶺而下迂迴五里始漸達山麓蓋來時徑路逶迤以漸而升故不覺其峻崇其實離平地遠矣所經數十里皆鑿土為凹凸儼如耙齒與夫呼為馬坎當因路險取以著腳然亦適所以絆足自此而南千巖競秀萬壑爭流儼如山陰道上碧螺高下如鬟如髻秀出天外不可梯接五里至余家鋪兩面青嶂削立中流一澗左沿山崖右倚澗曲嵐翠撲衣泉聲入聽山坳有磐石坡陀可構小閣使能擺脫塵鞅結廬逃世長住此山以沒世矣又五里盧家溝門又五里董家菴巖壑之勝移步換形目不給賞又五里青羊峽尖

居民環山結屋門外卽萬笏林立飯後行五里頁水河又爲
禮縣界頁字疑爲漾之聲轉然漾水之源亦不在此東邊一
山嘴突出下爲澗流絕壁巉巉作赭黑色上有尺五小廟祀
土神記其下聯云狄人所敬專在我上聯對諸侯之寶下三
字已泐去雖野老歇後詩亦可解頤又五里過上下潭土關
峻阪嶄絕山坡下羊腸一綫斷處皆支木板或捷石填土以
渡儼然閭道澗中亂石如麻青色浮現蔥翠如滴最高一山
削出青冥林木叢蔚日色皆爲所隔又十里王家灣又五里
雙廟子又五里至石硤關宿羅器軒大令自城百七十里遠
迢至此借村居爲行館暗如深室天未暝卽秉燭盤飧亦草
草今日共行八十里皆山路

十七日辰刻發石硤關南行二里過崖嘴子土色深赤峻阪一

綫升降屢屨右崖有磐石如坪上建小廟供觀音像對面兩
碑一碑順治中建一短碣光緒六年立建小亭覆之兩旁刻
石為聯又三里官場壩又二里安子坪山麓雖畧有平地仍
下削村民結屋其上零星棋布又三里扁頭上為登坡最險
處土人以沿山一綫路一面懸崖一面絕壁詰屈難行者呼
之曰扁然尚非絕頂又三里鷄子灣邨舍十餘家有關侯廟
又三里又一廟土人謂之老關廟始登絕頂上有方平地約
畝餘觀者塞途所經皆石崖齒巉巉如束筍自此下嶺皆土
道惟山根皆承以巨石爾雅所謂石戴土也山下為澗山勢
自北趨下澗流自南趨下每數十步輒隔以石板天然不做
雕鑿泉淙淙自石縫建瓴下注流為瀑布又二里州兒上又
三里包家壩過馬連溝羣山之頂皆有田宅或築土寨如城

對面一高山絕頂觀者憑崖指點雲樹杳冥天風跌宕遙望
之不啻神仙天半既而思之此身亦在絕頂彼此相望易地
則皆然耳又五里馬連垣河于又五里然坊鎮尖其地半屬
西和半屬成縣仍由西和縣供帳街市在山峽中民稠路窄
高下崎嶇飯後行五里楊家潭羣山又橫亘馬首自此登山
行五里發馬坡又五里戴家扁入成縣界遇此路稍平坦又
五里祁家壩又五里白楊樹垣河于又五里小川鎮宿署成
縣事陳易奇自城來遇見于行館供帳頗豐潔今日共行六
十里皆州歲科并致使者三年始一至故所至觀者如堵堵
並爭以小孩紅布蒙首從輿下過謂之過關男婦皆襁負其
子環立以待又有垂白叟自知風燭將臨報報然驚行卷伏
願出胯下路人揶揄聲騶從呵止聲又雜以兒啼聲真可捧

腹不知使者有三丈夫子皆死矣梵然無吉天下之不祥人也魏父老矣

十八日辰刻發小川鎮出市一里為中壩前臨一澗亦建飛閣以渡凡賴此者土人皆謂之橋子溝二里上街里遇涼水泉壩山路平曠溝塍綺錯萬山中行兩日始見此一片平壤宜邨居之稠密也又二里陳家番垵登土山即下坡二里南山壩又登一土坡對山苔濃如鱗中裂石紋有如龜坼前見土山絕頂皆埤為田此百里內所經雖石壁嶙峋凡有土處亦開方畀田中碎石如棋布于楸枰之上又三里關王廟垵河子又二里賈家壩過許家坪山土石參半皆深赤又三里索池壩自此下坡長陌如隄喬木蒼然交映左右曠野中有文昌宮三極洞達無甯隙又五里界牌溝山徑漸窄澗中巨石

如響泉流激澗人行石罅泉鳴足下如聞琴筑之聲上峻棗
坡行五里雖土道頗高峻五里湯房對面羣峯攢竦高入雲
霧又二里水泉子三臺山已在馬首絕頂灌木如薺蔚然深
碧又三里大川壩尖自高坡而下即望見一河前橫黃流滔
滔上為泰石山絕壁千仞東西橫亙行館即在河濱正對石
壁陳大令送至此飯後沿河西行折而南渡長橋登泰石山
羊腸一綫螺髻千盤巨石塞途大者如厦屋小者亦如几案
逢轉灣處石嘴凸出銳如鋒鏑陞阪留缺梯棧鈎連輿夫綽
夫自下盤旋而上邪許之聲山鳴谷應鉅閣崢嶸而崔嵬亦
無以過此矣山半回首望黃流僅如一衣帶十里始登絕頂
則山峯缺處但見波光滉漾而已山頂為隋州界有小墩臺
五承以土座建長廊覆之畧如神龍修路碑即陷于壁中自

此下山二里為田田灣俯視西山一培塿東向凸出上有獨
樹幢幢如蓋則為鐵龍關也行四里始達又四里樂蒲溝邨
民多樓居間有窩洞渡澗修廊一座上懸額曰澗上飛閣自
此而南凡過三澗橋皆在山峽中飛瀑挂樹積石成缸魚竅
玲瓏巖叢削劣下坡越澗雖險絕亦幽絕又二里貫口上折
而東路益窄又八里一天門絕高峻人家在最高處從石峽
上下如涉天梯過五里灣凡行十里至平樂鎮宿行館雖軒
敞以久未葺治丹黝已剝損鎮南有小碣記同治間地震毀
壞廨宇重修上橫刊明月山三字又有一額曰中天一柱今
日共行七十里

十九日辰刻發平樂鎮今日共行七十里皆兩面高山中為潛
水沿右山之麓循間行懸崖路狹遠視之僅白光一綫漸進

始知有路僅容一人行往來幾不能讓畔左臨深淵最陡處
高數十丈山勢曲折如之字盤旋行五里至茶尖溝南為陳
家壩隔岸望呂家壩卽居一簇屋瓦鱗次踰一大石溝出山
口高下皆阪田又五里中寨下坡為王家河以兩木板為橋
自此渡水又上坡過龍家寨望對河山麓有廟牆上壁竅大
書獨石山三字又五里橋子溝山壁皆青紫色鋒鋷如錐
梭外向路窄而磬踐之泥藪藪下所過絕險處皆有修路碑
不能停輿捫讀但記一碑上橫列永垂不朽四字一碑名垂
萬世四字羊公峴首之思古今有同志也又五里勝家灣遇
平安橋亦澗間也屋上有三聖宮東西兩山蜿蜒而趨至此
亂峯四合峽口一束東山高插雲表西山極崢嶸怪石嶙峋
可怖又五里吊子峪下澗行山洞豁豁中有小像外設一座

紅呢圍墊似欲行者之駐足澗中大石激湍噴珠濺玉從石
隙中過土橋三始登坡西山一路左折又南行東西兩山連
遞漸低同至盡處中開一門望門外兩山稍平坦上有土圍
園中列三樹幢幢如蓋又五里馬嘴石邨民數十家隨山勢
結屋參差登坡茶尖又五里冷鋪子屋下河流稍狹望隔河
澗上有飛閣人家藉以往來又五里升陡坡極險惡其地為
望子關在最高處關有神廟兩羽冠立門外託鉢將下坡一
閘闌壁上镌一明朝條告碑上書察院明文四字中有此為
通番捷徑云云惜紀年已泐下坡過野灣山徑旋轉如紡車
忽高忽下與從上升又臨懸崖缺處不啻繩行飛渡又五里
自樊家壩至賈家店始下坡初覺左山高山凹有邨落十餘
家稍前行馬首又奇峯突起山尾蜿蜒若神龍下飲于水蓋

右山又漸高折而南也又五里從坡下澗行至葉家壩尖飯後從屋下循澗行路稍平坦所經先石壁後土壁繼又土石糅雜對面一高山有五峯並峙二里至磚廟子又三里一村市頗繁盛有關廟門外兩坊已將傾圮一坊題英靈赫濯四字詢從者云其地為竭馬店然道左有釐金局額上書磚廟字而廟壁所貼告示文亦同前所經磚廟子土人呼為下磚廟或竭馬店亦有上磚廟之名也兩山之尾又趨而合至此一鎖出峽右山斜折向左望左山上有平臺矗出臺上有殿宇又二里東西兩山又一鎖出峽為東股城城在平田中小山上與東西兩山不相屬其形如長蛇城亦長而狹前仰後俯中一墩有孤樹子然高竦城下一澗繞之環城而過仍臨潯水又三里鐵河子又南為梁家莊皆在屋麓澗底東西

兩山至此又一鎖左山斜折而右右山亦折而左層層捲裹如芭蕉葉踰三溝曲折行五里至佛如厓宿以義塾為行館門外烟巒四合巖壑奇秀厓下為澗澗中拳石縱橫泉流其間淙淙不絕碧柳長堤青松列嶂彷彿吾鄉獅子林真天然畫境也

二十日陰雨道險不敢嘗試僕人來告僅費一日糧若明日不晴則深山無乞未處將有在陳之厄矣午後聞鷓鴣聲行不得哥哥為之奈何

廿一日晨起視重陰未開山凹出雲縷縷如炊烟毅然命駕行五里燕如厓下坡行河灘中流漸縱橫由石缸絕流以渡一里上坡登張坪上一片平地在右山麓又三里背峽里東西兩山戛然而止中開一峽峽門左右壁立千仞蔥鬱奇秀無

寸土附麗右壁高處有木植四五懸空卓立左邊大小巖洞
三皆在山半一洞前有兩竿後為神龕又前有長廊一道皆
僅存屋架牆盡圯自下望之梁柱皆細如葉藉傳興瞻眺據
邨人云兵亂時于此結屋避秦一洞中有泉十人飲之適足
百人千人飲之亦不見竭出峽山麓有神宇三皆三楹西北
向離立又二里白楊樹壩自此而南左右兩山仍層層包裹
如芭蕉葉捲二里遇清水河適當峽口對面一山橫亘甚長
色赤如赭上有神廟丹堊尚新下澗渡石砦又出一峽三里
為唐家嘴所經皆石壁嶙峋過此則秦阜土山矣又二里樊
家壩又三里上下嶮楞土坡斷續登降甚勞又二里苟家底
在山坡下河灘畔又二里柏樹壩又一里溝門路蕪窄道上
下趙家坪二里王家鋪又三里至甘泉尖邨民皆依山築舍

順稠密有義倉義塾行館即義塾也飯後天霽出館門外即過一澗澗中懸四扁一曰利行橋一曰安如磐石一為龍蟠二字一曰惠澤旁流下坡又過一節孝坊自文昌樓下過始出市門山徑偏仄復偏仄僅如狹巷兩山中仍為一澗澗愈行愈窄濁流亦漸清但仍挾泥沙下注耳泉從高處建瓴而下若有梯級每一層皆覆以天生石板板下或有竇泉涓涓若簷雷至一處右山徑路絕越澗登對山一險屋雖不甚高極崎嶇從屋馳下仍越澗回循右山麓行共十里為雙溝穿一峽而過山壁皆紫泥自此漸升而上登米倉山相傳宋吳璘屯糧於此共十里始登其巔亦名李家廟下山五里為小灣尚在山半又二里紀厓灣四面山色赤如血山壁皆紫為田麥苗新秀兼以苔斑綠縹與日光相射金碧晃耀懸厓雖

高右邊皆有餘地種麥其平如掌以北坦坦如康莊又三里
史家嘴至山麓蓋二十里而始為平地也下河灘行頑石塞
途皆赤色即以石為缸踰數溝溝水亦皆赤遙望右山麓有
一廟登坡桃柳暄妍邨居比屋五里蒲家樓又五里過大槐
樹至安化鎮宿洪化書院其北有慶壽寺內有萬曆重修碑
記則為明以前古刹矣署階州事張心鏡自城來迺今日共
行七十里

廿二日晨起浮嵐霧合浙滯露衣欲冒雨行候人以途險而窄
扣馬諫候至己初天忽霽行一里曾家街兩山間路稍寬右
崖上有一廟當轉角處如鳥翼然拱峙渡澗橋以木植架兩
崖中承以板而填土馬道左有兩碑一碑大書古洪化縣四
字按洪化縣西魏置此其故城也稍前有節孝坊丹青煥爛

坊之左土地廟三楹楹聯下云地居三寶首人民政事託根
基上云土口五行終水火木金口口土下一字金下三字
視未諦折而右連登兩陡坡皆峻絕左倚紅厓右連澗水道
郭家門前又四里窰鋪過石橋子行隘巷中土舍短垣參差
相接又二里樓兒峽渡焦家河又三里渠道里過楊家莊下
馮家厓一坊甚巍煥中為瑤池冰雪四字右質珥養親左和
九教子又三里梨樹峽梨花正開爛漫如雪又七里宋川亦
名柳邨垂柳千行綠陰如幙在太乙宮尖飯後循厓行路崎
嶇厓色深赤上浮慘綠色一層有如銅斑厓下巨石如磐赤
質而黑表黝然上浮如煤塗壁五里官堆下從澗底亂流以
以濟澗流頗濶共渡水四處又五里馬家街又渡水三處皆
支碎石為虹石大小長短不一鋒棱四出安置均未妥貼與

從其上過如蜻蛚之點水旋從澗底上一陡坡左倚絕壁右
為懸厓共三四折與疾轉如旋風不可謂非健步也對山石
壁作紫綠色下坡所行皆扁路又極崎嶇山溝斷處架木為
梁共過山梁三又五里為焦園下視山腳石壁黑如漆霏屑
溝塍如鋪炭于其上坡下一坊大書廉明慈惠四字蓋頌前
政之去思也其旁題識其人籍秀水字緯生而姓名則不能
記矣又五里湯房又上一陡坡一面懸空一面沿山左轉上
下石皆突出較前坡更險又十里自寇家莊過石家莊此十
里內山溝漸窄兩山聯合如欲闔筍扁路更崎嶇石壁上疊
下偃俯如覆檐觸之立糜碎讓而向右則深厓萬仞直削而
下或轉角處如弧線三角形與夫前兩人已轉後兩人未轉
與山隅鼎立與正懸空下臨無地或山峽兩石左右參差突

出與避左則右傾避右則左傾或峻坂陡削石滑如油疾行則跋前疐後行則蹙後蜀道之難難于上青天想視此猶為坦途耳對面石壁杳冥無極望之如奔雲怒濤層疊涌現又如枯木槎枿平鱗鱗甲又五里王家莊過磨峪清水溝下澗蹇裳涉水而行遙望左崖上有紅欄曲折從人告余為真武山上山有水簾洞括州志云懸崖瀑布時如千尺白練垂空而下時如萬斛貝珠傾囊而出又如環珮渠筑暉綬雜鳴壁屋環折儼若斷缺彷彿武陵仙境惜避高就下交臂失之以俟歸途後游矣又五里至階州沿白龍江即西傾山南所出之墊江桓水之異名也長堤一道寬平如砥城當山峽遠在河流之下使無此堤以禦之則久歎其魚矣進西門至貢院沿途觀者如市既卸裝見張刺史前在甘州聞有種騙之徒懸

賞未獲今張刺史已緝獲兩人並有贓証誠健吏也又聞文縣增生張乾騎驢到階州失足墮崖死為惻然者久之

廿三日已刻謁廟講書畢歸署放告

廿四日生童古場階州周廣文監場言此間產金線絨其毛襪厚可以為褥絨大于猴有高至四尺者抱子行絕頂跳躍如飛人以火器擊之知不免輒釋其子而飼之俟其飽然後拱立待擊獲其雄牝者跪地哀鳴亦可憫已以猴為糧羣猴至擇其肥者置一石于頂餘猴皆去此猴惕息待食無敢動又云地常震甚則山崩光緒初大震白龍河西一山飛墮城中壓學宮圮學宮亦廢焉

廿六日覆生古金線絨歌無一人能屬稿文興可有金線絨皮詩何今人之不如古也

廿九日文成雨屬量正場此間堂北向正對五峯山秀出天外
四面山半露粉牆知為神宇東面有結屋山樓者窟室參差
仰望如蜂房羅列初到時麥田尚未茁今則蔚然葱秀新碧
如茵雲縷縷出其下因得句云雲中新綠麥苗肥惜未能足
成一律也屋後層巖環繞後一層高削青冥距城數十里望
之如在附郭每天氣陰寒早起輒見峯頂積雪皓然不以爲
異也

四月

初九日辰刻發洛諸生畢束裝聞地志錄出碑目三紙以階州
文縣兩單交外巡捕季子衡又託鑄江左右之文縣十餘碑
屬岳廣文內宋吳提保蜀碑高一丈五尺約五六十字尚未
曾泐損此外仇池同谷皆有宋石仇池距邑城載遠揭碑人

恐憚修阻耳先交工價二十金

初十日晨起細雨溼濛行裝已發不能展期即出西門上河堤下堤行河灘中王游戎李大令偕三屬教官送於官廳張刺史訂遊水簾洞即於此送別洞在陡崖高處無濟勝其望洋興歎登數十級有佛閣臨崖倚闌茗話徘徊一時許見天色漸霽即下厓共四十里至柳林仍尖于太乙宮來時柳條初放今則濃陰如織間以碧梧人行其間衣袂皆綠飯後行二十里至安化鎮宿介侯子沂出訪碑鎮西南二里祥淵廟有宋碑四一顆題祥淵廟碑八分書末行有朝靖郎直秘閣權知階州軍州兼管內勸農字下泐文內有瀋熙十年字一為重修赤砂祥淵廟記乾道四年黃揆文陳掄書丹楷書一字不損其碑刻成時以石屑和蠟塗之光明如鏡碑字在內如

隔一重霧可望而不可即介侯云壽陽一宋碑亦如此歷久完好以此無從推拓亦以此又兩碑皆敕滕一分兩層慶元四年刻一分三層滿熙十年刻季子衡送至此即以捐碑事託之

十一日辰刻行五里即登米倉山升降四十里至甘泉尖此山兩峯蜿蜒中隔一溝僅如隘巷惟山頂有平地如修陌約長一箭許左右懸崖空濶此外皆沿絕壁行山盡而有郵市即甘泉也下山度一飛閣閣中梁枕面背有額來時僅見南面三額今從北面視之其一曰利行橋其一曰常路其一曰水帶山環其一曰心存正直飯後行三十里至佛入厓宿過嘴峽于峯巖奇突來時即徘徊不能去繼曉重遊宛如異書再讀摩挲不厭諦視山骨皺瘦迥軀軀作波浪紋無首且洲巖

山下三廟一祀關侯一祀文昌其一中塑女像三不知其何神也將至佛入厓左壁刻佛像工甚劣像側有石一方低陷磨治光瑩遠望似有波濤即視無字蓋磨而未刻者也未食山四圍石皆深赤色周廣文謂亦是朱圉之支裔此次南來至渭源即見鳥鼠同穴山伏羌經朱圉之麓階州南去盡西傾也余謂介侯禹貢西傾朱圉鳥鼠六字吾輩行之年月未能盡古人文字之簡宜後人可及

十二日辰刻發五里賈家店對面山腰石室僅存間架石棧天梯鉤心闢角但表裏洞然盡見如懸鳥籠于壁上來時在輿後故未見又十五里葉家壩尖飯後行五十里宿平樂鎮過吊子峪三山鼎峙水流其壑巨石如磐縱橫棋布聞山半丁丁琢石聲河灘文布為棚有武生三人迎謁適在下與揖之

詢所作據云夏秋水漲時壑中水高一丈餘舊在左山壁鑿石為閣道距地僅丈為潦所衝今壁上尚有斧鑿痕張刺史籌款修築較舊址又高一丈餘先以炸藥轟之鑿石為洞以木橫植其中上建飛閣寬以八尺為度可通車馱即蜀中所謂棧道也始悟山行所見石壁有洞累累皆閣道之遺跡今日所行七十里皆扁道以望子關前後十里為最陰然山水之秀絕絕塵表亦為平時游躅所未見七十里中裂石雷門飛瀑挂樹架長碕於斷壑儼列修廊漱春磴於驚流上臨飛閣崖橫斗柄可為垂釣之臺洞挂槽巢便是修真之觀從垂榆柳井樂桑麻結廬則屋後皆山灌園則門前近水至於一邱一壑履曲所不到華舌所難宣移步換形未可殫述使能援賀季真之例鑑湖一曲乞作菟裘南面王何以易此

十三日辰初發二十里自藥蒲溝登泰石山又二十里而下北山之麓成縣陳大令蘄芳迂于河干過橋至行館尖飯後度酸棗坡又涉一小山共三十里至小川鎮宿酸棗坡視泰石山高不及半土道平坦即泰石山來時涉彼崔嵬我馬瘠矣我僕痛矣今亦不覺登降之勞蓋三日懸崖鳥道此山雖高猶康莊矣

十四日卯刻發三十里砥坊鎮尖屬西和境徐綬卿大令自城百二十里來遇三十里石峽關宿禮縣境今日行山徑蹊間亂砥環列梯級鱗次羣峯皆上銳下豐頗似塔上相輪又似盤香層層螺旋而上四圍隨高下種麥碧浪翻風漸鋪至地宛如簸箕循厓馳下不知身在最高峯也石峽行館湫隘黑如地獄蟻虱蚤蚤無所不有如此佳山水如此邈通西子

誠美如棠不潔何

十五日辰刻發三十里青羊峽尖五十里進西和北門仍宿溪源書院自石峽關至青羊峽來時覺扁路極窄今日行殊坦坦觀於海者難為水山行亦猶是耳

十六日辰刻出西和南門三十里至石苞城緩腳投茶尖送別未至前二里廟兒山有古刹其下石壁兩面皆造象城在山陽三世佛大象一龕在人家屋後小象林立皆鑿龕于壁石質本粗歲久風雨剝蝕已甚據邨民云尚是唐以前物不應無題識然遠視無波磔可尋縣中一紀綱尚晚事屬訪之三十里長道鎮尖過劉家牌坊來時所見有標必堅四字其一面為無鍊不精真強對也飯後行十三里過祁山堡大風雷雨欲至武侯廟避雨已登山半遠望麻樓尚遠折從北麓下

山天亦漸霽又行十七里至鹽官鎮宿聞鹽井日汲千餘桶
不竭秦州之徵糧兩當諸縣皆其引地

十七日辰刻發六十里牡丹源尖來時設行帳于一破剝之前
庫陋如豕欄今移于寺後面北三楹門外廣場前對戲樓地
雖小尚高爽視其額曰白衣寺飯後過華林山共三十里至
秦州三十里鋪宿餐正書塾今日長途迂折號九十里實不
止百里

十八日辰刻發向東行兩面高山環峙山下田疇沃衍中間廣
陌綠陰夾道參浪翻畦山麓樹林深蔚之處邨居栢比間有
陶穴五里一鋪過二十里鋪踰一溝其水自南而北復折而
東趨沿北山麓行但澗為平灘中流涓涓若衣帶灘兩旁高
岸仍種麥至十里鋪南山斷而復起又踰一溝其水即從山

隙斷處流入由北而東下灘登對岸折而北又折東行沿北
山麓進城道旁墓碑林立蓋秦之北邙也秦州為甘南富庶
之區士女昌豐肩摩轂擊其城內外五重第一重為伏羲城
有伏羲故里字路北有伏羲廟規模極巍煥再進為西關再
進為中城再進始為大城而中城又分兩層進城先經游擊
署東為隴南書院又東為道轅貢院即在道署之左其東為
守備廨既卸裝以次見蔣游戎張刺史余大令張刺史云已
拿獲匪徒五人三人供認梓包一如階州故技黎邱之鬼愍
不畏死非一物一技所能蔽辜即屬其從重嚴辦並錄出舊
例三條與之

十九日已刻謁廟講書學宮枕山前為儒林街文明坊層樓當
道上祀文昌中為魁星閣

廿六日徐綬卿大令從西和拓寄紹定二年后土祠碑記三通
三十日已刻獎賞生童畢張刺史來見呈禮縣掉包供狀首從
五人皆蜀人也歸署易行裝游玉泉觀出西關折而北上土
山拾級而登過迎仙通仙兩橋聯額如林絕無佳構再上山
門以次經靈官殿廣嗣宮張刺史方捐俸修葺有督工紳士
兩人導游玉虛殿老子廟北極閣諸處先賢祠祀李杜前為
論文間玉虛殿之右為工部草堂其右偏有精舍三楹懸予
美戴笠像啜茗小憩望對面山屋有窰室雙扉寂然上懸一
額曰茅庵舊蹟山半空曠之處有明眼亭前楹一聯云終古
泉聲裏四圍山色中登亭遠眺四面數十里皆見羣山環拱
一覽無餘為觀中最勝處從者指點北山深處綠陰罨畫即
南郭寺也元碑三其二在玉虛殿一至元封枝四面刻一至

大詔書其一在老子廟前為文昌殿記其陰刻官負通俗之號蓋題名也趙文敏四石在論文閣狂州落款僅有松雪二字未敢信為真跡此外詩碣尚多皆近時刻涼風颯然山雨欲來即命駕歸

五月

初二日辰初發試院之東為縣署又東漢將紀信祠內外洞達甯然深邃穹然高敞出東門門內有蕭公祠武侯祠以次過武廟天水書院門外建節孝總坊又有一短碣題武騎尉李公講學處出郭門望南郭寺甚近綠樹紅牆參差掩映惜昨日之未游也二里大教場折北行又三里登剗河嶺嶺雖不甚高十步一折土阜在左坎窩在右頽牆齧缺裂為深溝沿溝麓行窄處祇寬尺許亦甚崎嶇又三里馬梁嘴又二里下

嶺為南河川四面羣山圍繞中為渭水從西面山峽中滔滔
東下有三艘渡客遇者爭舟人馬雜沓既登岸又二里自樊
家灣上馬家山又八里而達其顛又五里夏家石厓下厓右
沿山壁左沿渭水凡行十五里而至石佛鎮尖據史關路程
里為山半里舟由七里為陶石佛寺在鎮之南首其門北向
秦安縣張覲臣大令自城來逆飯後出鎮即登山五里李家
半坡又五里王家寨又五里自康家河至王家河迤邐上升
愈行愈峻安有河流可見疑此河字當作山陽之陽亦俗吏
魯魚之誤也又五里羊家堡茶尖其地為羣山最高處四顧
峯巒縱橫列峙如大海颶風紫瀾湧出自出石佛鎮山路皆
一面土壁一面空澗忽東忽西至此則兩面皆空天然長隄
一綫左右山脈皆自西而東中間如堂如阜如坊如斧皆已

墾為麥田無一寸平地又三里孫家鋪又七里南瓦窰又五里自陳家莊過蔡家莊莊屋皆在屋下綠陰一簇中藏環堵自此下坡又南為王家新莊陡崖直下勢若建瓴凡五里而至坡底即為秦安城南關關大城小進城至縣署停驂臥室在花廳頗有竹木之勝

秦安距石佛鎮四十里抵城一土山出鎮即登山下山即進城

初三日辰刻出秦安北門一里過教場又二里黨家拐又三里蔡家莊又三里十里鋪前臨一河河西樹林中有村堡沿河行二里為由夫子山前此所經皆土山至此忽絕壁撐空峯巒鬱起其山如以百千巨石攢簇而成棱棱外向望之如猛獸擎攫又如劍戟森然鋒銳奇銳不可逼視山半石壁方丈許如一堵牆獨平如砥瑩如鏡道光丁未潘陽吳世春題天開石鏡四大字其左有新建鎮陽關碑記督工紳士徐利賓

撰云吳君字鵠雲其下半已泐上截道光年號尚存也又左
有吳徐兩君題名亦剝蝕徘徊久之沿山壁曲折行至河流
淺處與夫蹇蹇徑涉對面山壁亦奇秀又三里石窰渡胡盧
河水不及馬腹又五里何家坪茶尖自此登屋過蔡家牌坊
烟戶稠密頗有閑閭高峻如其坊題曰蔡蟬善行坊又自楊
家金城渡河為宋家河灣曠野中有神廟戲臺宋開路程軍
宋時在前楊
城在後詢之土
人而知其倒置一路卹堡不絕自楊家溝槐樹廟至買家牌
坊明為孝子負自
建在街西又過羅園里其地大道中裂為一溝似深隍
民堡在溝東人行西麓極曲折崎嶇共行二十里而至郭家
鎮鎮有土城築於高阜几上陡厓三層而後進堡門宿河陽
書院今日共行四十里夜大雨

初四日辰刻發門外積潦衝塗泥深沒踝出街北沿堡牆登坡

此山首尾七十里左右兩山如龍蜿蜒夾之而趨山壁漸削
 袤延深谷土阜鱗次皆阪田也中間山梁由南而北儼如長
 隄一道左山連右山近窄處僅容車馬寬處兩旁畧有田疇
 每數里輒有一墩皆圓如穹蓋其墩下平曠之區邨落聚焉
 五里有邨屋十餘家山下東為孫家坡其西山坳瓦房一簇
 黃泥一綫曲折繞之土人呼為王家暖莊據路程單此為暖
 泉莊而山上則為王家蓋折而二之也又五里邵家店山下
 東為背後溝西為趙家背又五里吊坪梁已登山脊兩處皆
 杳無人烟僅有頽墻老樹又五里丰節墩山風砭骨一棉不
 足禦寒稍憇添衣又五里胡家窩左右兩山漸行漸近三面
 勢若合抱對面一墩隆起上有土堡繞墩右曲折而過又上
 一墩五里自王各子山至馬家窩自丰節墩而北東西兩坳

時有邨落又五里周家斜道天又陰晦雨點驟至竭蹶行五里至王家鋪尖東山左折西山右旋至此西山如屏橫亘與所行之山合而為一東山截然而斷斷處豁然開朗遠望重山層疊直接香巽其北又起一山飯後天霽望西北行左右仍兩山翼之五里羅家茶店又五里張家寨又五里朱家坡卽下一坡西面山下極低處有黃溝一道曲折北流又五里劉家耕門自此下山五里經陡坡十餘折而至山麓涉一小溝山壁有石華碯凡土山至山足無不有石骨也前為碧玉鎮土人呼為碧門關有上中下三關皆在高處升降梵碎石為級下關隔一廣場而至中關再過一河灘涉河登岸而至上關借民房為行館其廳事門外懸熙朝碩彥額內懸陶仇造徽額蓋亦此間世家也今日共行七十里停驂始得平地

前望羣山橫亘又不知幾何層矣夜大雨

初五日雨滂沱達旦自辰加巳勢稍殺午餐畢甫就道衝泥出街西折而北東西羣山環拱中為一河暴雨之後黃流湯湯甚急初沿南岸行渡河沿西岸山溝拳石紫如玫瑰升降土坡五里又涉一小溝溝北為閭川子五里渡河至石灘又三里鴨子溝其地在兩坡之中積潦盈塗泥滑如油又二里何家溝一名九頭溝地勢畧高有邨屋十餘家又三里自雙堡子至吳家川雙堡中為一河通以小橋兩頭邨民列屋而居初出碧玉鎮四面皆亂山塗甚狹漸行山徑漸闊平曠寬廣至此則前望兩山又一束對峙如門三里東峽口出峽沿河西行河北岸皆石壁南山盡處西峯有浮圖六級五里馬家磨回望南山塔已在後矣自出峽以西道甚平坦又五里至

通渭縣城進東門至縣署宿見民居皆以柳條覆屋蚨蛸垂檐長街一碧始知今日為端午節草草勞人良可浩歎

初六日辰刻出通渭西門郭外有河如帶折北渡河行五里白頭背又八里舊店子村斷為二中為曠野兩頭各十餘家又七里新店子登坡上四架山自南而北山梁經兩荒邨東風狂吼為西面土壁所遏勢若焚輪共二十里而至山麓卽踰一溝前有村落為普耳川在荒店烹茗小憩出邨卽涉一低坡坡盡有溝涉溝前而三峯鼎峙中間一山橫亘如屏東西盡處山峽中皆有路可通將至東峽乃不出口忽折而西行土巷中五里為何家坡坡下有澗升坡折而北行出西峽門忽見石壁巉巉澗中亂石攢刺如巨刃摩天森森武庫兩山聯合中隔一溝不踰尺許從左山壁升坡經兩大石坡怪醜

可怖一石昂首如老龜一石立對岸甚長上覆如蓋中陷為
坳遙望之如碑亭一座五里下坡峽口有樓當道土人謂之
菩薩樓中楹畧高左右兩楹翼之道出其下宛如橋洞樓下
左旁有一碑下與墳之乃道光二十八年修石峽記邑人劉
廷口頌其邑令之文也稱為屠海三先生而不書名碑左右
壁刻南無阿彌陀佛六字亦近人筆自出峽後沿河行兩面
皆土山而時有石坡當道共十里至馬營馬營為往來通道
人民稠密街市殷賑視通渭城殆過之共三堡東西相直中
為老城東為東關西為西關繞東關而還進老城行館即縣
中分廳每歲秋收以此為催科之地規模極宏敞

初七日辰刻發穿西關出過三里墩又二里油坊又五里白土
墩皆有村落又二里侯家里自此登坡三里上牛營山其頂

亦名銀條梁五里下山踰一溝為牛營堡設茶尖又五里李家河間從人亦名杏園子又五里杏兒川人烟寥落僅土屋三四家又五里康家鋪有土堡已頽破通旁有樹綠葉黃花根莖尖刺銳若針鋸從輿中折得一枝詢從者則詩所謂檉腳且連條且也又五里大高家茶尖自此下坡涉一溝頗寬而流甚窄黃潦一線曲折如繩又登坡行五里小高家望右首土山背有高閣兩層斜對一土堡紅土寨即在其前今日宿地也又涉一溝行五里而至其地今日共行五十里係小路不通車道乘車者自大路行五里康家灣十里上礮灘由此登山二十里腰兒山三十里傅家烏泉下山四十里韓家堡五十里甯遠莊五十五里高家營六十里亦至紅土寨

初八日辰刻發所經官道皆在山麓深溝之上遠山回合田疇

寬廣以為坦坦平地及下陡坡踰溝又自陡坡而上始知已
在高處非平壤也七里店兒上又三里華店堡又五里麻子
川又五里李家堡茶夫共踰三溝而至此又五里韓家坪又
下坡涉一深溝自此無溝道矣又五里景家口又五里馬家
鋪又五里景家店邨民通賽社演劇觀者如堵又五里石家
坪一土堡據高處甚小而固又十里至安定城自北門進遇
新建城濠一橋前令閤少嵐題曰偕樂橋所署姓名已為妄
蚩者磨而去之此亦不言之口碑也至行館宿

初九日卯初即發仍出東門沿女牆行由此而西北即官道三
度經此矣三十里鋪茶夫又十里炭口鎮鎮西左山嘴有神
廟因山高下殿宇兩層涉雨水其一流稍寬支二木為橋不
能渡輿夫皆脫屣以濟又二十里秤鉤驛尖飯後登車道嶺

共六十里而至甘草店途中作五律二首又補作菩薩樓七律一首

初十日辰刻發烈日當空大風揚垢土溝深處沙如湧湧靚面不辨塗徑二十里清水驛尖飯後行二十里夏官營茶尖又二十里金家厓宿作五古一首昨在甘草店聞此間久不雨望澤甚殷輦秦途次連宵大雨此間僅沾衣數點而已雨晴寒燠天地之氣迥然不同以車道嶺為之隔也異哉

十一日辰刻發二十里過響水子塘茶尖又十里桑園子自響水塘下灘升一大石坡即見邊牆邊牆之下黃河滔滔東駛自桑園子下灘升一大石坡折而南又登山河流為山所隔又折而西自此沿黃河南岸河流時遠時近近岸山峽中窺見北岸羣山皆上土下石石壁約高丈餘承土山下如牆之

有基址然此亦天工之巧否則為河流所噴矣三度經此今日始詳察其形勢而記之又十里繞胡家墳有豐碑四石人石馬自此下坡為東岡鋪尖於行館飯後出堡東岡堡東西二門東頭一門如圭竇隘不容車繞堡牆而過共二十里抵蘭垣東關進城拜茲帥未見即歸署

十五日日補何方伯招飲設席園亭喬木扶疏皆二三百年物聞牡丹芍藥甚盛惜花事闌珊矣園有花神廟廟左廳事三間有木屏六扇刻乾隆中藩司王重望行書筆力雄健龍蛇飛舞自暇案伏法後後人磨去其名氏不知正可留為殷鑒也

十六日慶潤溥太守來慶陽飭查一素太守已訊明由府理應張某與其家丁招搖撞騙合得銀五十兩作為廟工罰銀乞

恩免究案已結矣又何恩之乞若不見告則并此無從知之
即允之但以現任職官執法至此且於鄙人名節攸關置而
不問亦落得為茶邱矣成縣岳廣文來一函保蜀碑拓三十
通宋碑五六種亦訪得此舉為不虛矣

二十日按部西甯辰刻出蘭州北門渡河折而西三里徐家灣
十里店換驛此十里途長浮一倍二十里鋪茶尖又折北入
峽行兩山間又十里沙溝口石山盡矣土山湧出綠苔楷壁
高下一色山頭時時有一株小廟翼然外向又十里朱家井
尖飯後行三十里余家灣兩度宿此矣仍以邨店為行館甚
庫陋未至約二三里許出峽下坡四面皆土阜層列淺紅濃
碧霞駭雲蒸田中赤埴墳綠苗油油然方秀真所謂丹青寰
宇也得七律一首

廿一日卯刻發四十里至鹹水河尖飯後行未半四面陰雲驟合如欲雨為狂風吹散此間亢旱地燥望澤甚切風伯何不仁也三十里紅城堡宿

廿二日卯刻發出堡西門十里龍泉寺在街北又十里青寺堡茶尖過堡約行四五里道南有玉振觀共又行二十里至南大通驛尖於關廟驛為四達之衝北門外登一小峴通寧夏道即客冬所經之程也署平番縣事裕端自城來迎云以祈雨供張皆素饌告以本可食無肉固所願也飯後二里過轉輪寺已鞠為平蕪門前有八角池土人謂之神泉十
大柳樹莊浪城守尉諸官迎於滿城外穿城往拜以天大風雷驟雨欲至未下與即攢行三里至平番東門天亦霽進城仍宿龍岡書院

廿三日今日赴馬蓮灘百廿里道阻且長戴星而發自北門出
走大沙溝為大路稍迂自西門出走小沙溝為小路稍捷夏
秋暴雨車馬往往衝漂從前沈文忠公從彭咸之遺則即此
地也據飭從者行大路渡莊浪河適當水洄流三道皆不甚
深廣五里至大沙溝口羣山之中土墩離立上有神廟遠望
溝中一峯紫色秀出天外又二里集家鋪又八里石門口進
口皆磐陀大沙石黃色紋理磊砢稍進即為土山其下石根
皆紫色山還曲折畧如盤蛇自此而北為青沙嶺又五里羊
腸沙溝兩面雖山壁森立尚不甚陡山蹊亦不甚偏仄即有
暴雨山腳坡陀緣崖可避不知何以號稱絕險也又前高油
城赤壁斑駁其外雨淋積土掩之不啻衣錦之尚絅也道左
餘垣頽廢有土人奔集望之儼如鬼自此登坡上山梁下視

車路轍迹一綫共五里至楊家溝灘茶尖邨居寥落對岸土
屋中亦仿佛有人烟麥田龜坼土皆成塊又五里登嶺脊四
望羣山拱列如火如荼自此下坡先沿山壁行右為土溝漸
下入溝中五里二層台子又五里新站尖自沙溝曲折上陟
不覺其高下坡遂迤十里始至平地云飯後即進行街盡處
臺土為塔二級上塑魁星立象意者地荒民瘠不能建傑閣
聊以此為辨香之祝歟遙望對面山頂有一土墩凡行十五
里始至其下即牌洛溝有土屋十餘家又三里雙牛鋪又十
二里小嶺子不見片椽環堵又十里塘房茶尖又十里薛家
鋪過此兩面山漸高又二十里出沙溝口對面高山橫障如
長蛇中間廣場南北皆林木叢蔚其北一小城大通縣丞治
此亦名河橋驛再北二十里深山中為連城土司界其南十

里即馬連灘

行甚近實不及十里

再南二十里上下窰街為紅山土司

界至行館日甫斜昨遇平番苦旱此間青苗已涸然詢土人云有渠水之利高亢之區未嘗不望雨也夜卧人靜聞大通河流澎湃不啻千軍萬馬之聲

廿四日卯初發馬連灘南行一里馬軍堡折而西涉大通河船平方式不用篙櫓繩繫兩岸以手挽之徐徐而渡於西岸登坡南行遙望冰溝口羣峯層起最高一峯蔚然蒼秀隱現雲際河岸為土山所障折而西過七里店子田廬相望氣象頗為殷實其實距馬連灘四里從土街中出仍沿河南行共十里至冰溝口道左有乾隆四十三年分界碑東岸為木塔拉亦有船可渡山泉一道自冰溝中流出入大通河至此始折而西進溝口紅山土司指揮食事魯服西漢衣冠迎道左聞其種族

為唐沙陀國之後山中尚有唐明宗兆域及李景王饗堂初入溝路尚不甚窄寒氣陰森不見日色十里至岸門兩邊土厓赫如渥丹其深者如紫玫瑰左方一堵作鵝黃色尤古豔自遠望之髣髴如紺宇紅牆照耀天半余為題八字曰金碧樓臺丹青寰宇又五里白龍灣聞舊有龍王廟今鞠為墟矣又五里趙家坡左壁絕頂有土堡又五里山勢一束陡高而窄怪石嵯峨流泉交錯為一溝鎖鑰土人謂之冰溝峽有沉官出迺兩厓石壁渾如潑墨紋理中間帶青紅之色玲瓏巖瘦軀軀作波浪紋細察之片片欲裂其至薄者如紙摘以木簡厚札橫砌而成造物之巧真不可思議又五里至冰溝驛尖蓋溝中之山之峽之驛皆名從主人也飯後自溝出即登華里坡土人稱為牛坡共十里下坡又十里大灣山其上

有闕帝廟又十里下坡入羊腸溝溝僅一綫土深紅色兩邊
高崖插天如行筭井中曲折盤旋又十里路漸行漸寬廣至
豁然開朗處則老鴉堡也即駐宿

廿五日辰刻發出堡沿河南行稍前為田舍所阻四里過晁馬
兩莊又一里北奶子有村舍三四家流泉一道涓涓行隴畔
從者輒以手探之詢之則溫泉也流至南山麓有天生石缸
貯之昨所淪茗即此泉也云可療疾又五里蒲家口亦名十
里墩然街西一坊上題水磨塘三字又五里長道里過此官
路又臨水次河流為石所激洶湧有聲又三里柳灣對岸山
壁盡赤土屋下有渡船柳陰四布不啻身在畫圖中又二里
高廟堡茶尖街斷續分三道其西首有聖母宮又五里河漸
趨而右為土山所阻北折上坡從土峽中穿道而出仍曲折

向西土壁剝落其細如塵馬足蹴之揚起眯目渡土橋抵段
家堡又五里石嘴子又五里天溝塘又二里土道隆然突起
如高岡長不及半里從東口入一綽楔巍然當道出西口有
傑閣是為楊家寨子又十里過上下水磨又三里抵神香溝
河水從連城山天堂寺發源南流至此疊石為橋以渡登岸
經龍王廟八蜡廟稍前即為峨伯縣東關關外有炎帝宮東
嶽廟西來寺適當社會之期番民雲集皆貨驃馬及珊瑚巨
羅巨羅可製墊褥略如絨布其衣皆紫黃色如喇嘛宿東關
內鳳山書院距城關僅咫尺

廿六日辰刻將發張軍門行志出郡閱標兵自賁德巴燕戎格
周歷至此昨宿平戎驛今晨趨行未拜即見之云所經南北
山皆極高峻廣博無限山中毒瘴充塞觸之脣青氣不能出

雖牲畜亦喋不能前稍設即發出館折而左從南關外渡湟水河灘棚架如林民番於此互市渡河對面兩山如屏中間一峽以通道二里古教場又五里七里店子隴畔堆大小石爲墩宛如汎臺又三里段家厓稍行偏左上一陡坡極高峻厓壁赤土中嵌綠石坡下沿湟水又十里深溝從廣場下坡一山溝橫於前涉之即入深溝口又五里馬哈喇鋪又五里三十里鋪又涉一山溝登岸地勢寬廣遠山環之不獨山壁渾赭田中亦皆赤埴墳對面兩峯橫亘從山峽入即所謂大峽口也兩山皆石壁河流其中水色淡鮮淺碧與淶波相映明豔無俦即下與徘徊水次從者告余云從前左文襄征回至此苦戰不能入徐軍門占彪至始一鼓下之蓋與小峽口同稱天險共行十里至高店子茶尖又二里羊蹄鋪入西甯

縣界署西甯縣事王樹棠自城來迂又八里土沙灣又五里東影兒又五里平戎驛有土城極高峻外環一堡防營所駐廿七日陰雨候至辰刻雨霽始發二里觀音溝又三里西影兒過檢紫溝又五里石家營又二里土山鋪自出驛沿河漸行入田疇中河漸遠至此折登一高崖左旁赤壁其右復臨河流曲折行二里柳灣又六里馬營灣又五里上下紅莊此十里中地廣沙平中田有廬山色與土色皆深赤日色射之金碧耀目又三里中寨行館失飯復行五里三十里鋪過西溝河王家台子又五里入小峽口山水妍秀不如大峽而險窄過之河流砰訇道右有長橋可涉北岸橋下皆皮筏鼓羊皮為舂盛麥其中可順流以達蘭州過武定關梵梵為門垣隔岸亦有磚牆為欄樓稍前山半有風洞朱扉封鐫下為風神

廟門外兩碑右一碑題風神壇三大字詢郡吏云洞門本開
因新接崧帥檄南路多風故暫閉之廟之西河畔有大石坡
如數間屋色如翡翠晶瑩可鑒對岸水面露黑石灘滾如潑
墨亦奇觀也又五里羊溝灣始出峽又五里陸家灣自此每
五里即換驛又五里十里墩又五里曹家寨亦名五里鋪又
五里抵西甯自東關入進東門至貢院

廿八日辰刻冒雨赴郡校行禮講書畢歸署故告收帳伯賁德
求開復兩紙其餘皆節孝呈也

廿九日生童古場聞瘴重不宜早出黎明起出點名

閏月

初十日今日本擬登程同城文武公宴堅留一日此間距青海
二百餘里由青海而西南通藏衛官場餽遺皆以底茸藏香

藏藥及藏地所產紅花雪蓮紅花性能活血婦科要藥雪蓮云即破故紙從前狐裘值極廉自光緒二十二年後藏番貿易者改道蜀之松潘一販貴至十金捨刑更稀如累風矣

十一日辰刻登程自東門出積雨初霽塗泥蹉蹌遇小峽山水建瓴而下為亂石所遏搏而過潏湟流洶湧迅如激箭轟若奔雷山麓沿河水皆拍岸使再長五寸許則望洋興歎矣出峽由三十里鋪渡西溝河來時僅蹠添一勺今亦流深湍急儼然巨漲材官策騎先渡水及馬腹奴子候水次請以所乘車濟允之一勝一敗十人挾轉從驚濤駭浪中亂流而濟耳目為之掉眩尖於中寨飯後大風從山壁逆旋而下嶽巔岌岌欲動宿平戎驛遇觀音檢茶兩溝來時無一滴水溝泥圻裂可揭塵今亦汪洋一片成澤國矣或騎行或徒涉乃知冰

蠡陽侯其一怒為可畏也聞礪伯城外湟水亦大漲明日能濟尚未可必屬王太令先以一騎往探之

十二日探水人歸云湟水未退請無渡河留一日

十三日大風卯刻即發穿三棉輿中尚寒甚二十里高店子茶尖又四十里抵礪伯縣城外朱太令渡湟水來迎同立河濱見急湍奔駛颶浪倒流舂舂之聲振耳僅一渡船甫解纜即隨流直下數十丈雙槳齊划更以水夫十餘人用兩繩逆曳之始漸流而上得達彼岸今日共行六十里所過溝渠無不驚濤拍岸仍宿鳳山書院

十四日已初始發行數里雨漸大泥滑如油三十里高廟茶尖避雨久憩又行二十里至老鴉鋪宿

十五日昨夜庭中浙瀝有聲曉起視天容如墨隔窗峯頭雲氣

消然其勢厚集盥拂甫竟大雨如注行李先發者皆折還云
泥深屋陡策馬不前踟躕至亭午天漸霽即傳餐登程山土
色本赤經雨後坎窞深尺許如醬缸甫入羊腸溝探人自東
來扣馬言大通河亦暴漲不可渡漸行日色漸晴點萬山雲
起俄頃四合風雨驟至疾雷繼之二十里正登大彎山頂雨
脚如繩如銀河之倒瀉四面皆荒屋違谷無一椽可避又冒
雨趨行約二里許始見有破屋三四家冰溝驛把總來迎即
請入民舍避雨憩土炕約一炊許雨漸止即行自此下坡山
梯絕陡泥滑如油同來夫役筋疲力盡幸汎兵四人左右扶
掖又一人執舂鉏開道始竭蹶至冰溝驛宿驛在溝口崖畔
湫隘陰寒院墻已傾侈即以左右兩山為壁門前適對峽口
夜月初升從山峽中穿雲而出荒寒清曠別開奇境

十六日晨起聞河水驟銷驛舍庫隘不堪棲止長刻遂發行三十里甫出水溝西大通外委安生祿乘皮筏渡河來迓云河水漲七八日矣無一人一騎西渡始知前此謀報皆屬誤傳大抵曠伯惟恐其不出境平番亦惟恐其卽入境視安弁之奮勇前來不啻霄壤矣出溝折而左道泥濘行田埂上寬僅布肘抵七里店王巡捕先至已為賃民房稅駕居傅梁姓莊農也所居北房三楹上有承塵下鋪地板頗潔淨從者住南房諺云俟河之清住此以待河平蓋不知其幾日矣

十七日午後挈一奴子步行至河干覽眺兩岸水勢浩瀚中有沙灘截河流為小汊建飯南駛其勢未衰望洋興歎徒喚奈何作詩二首

十九日天甫明聞奴子言河水漸退大喜卽命束裝至河濱僅

一舟仍以繩渡故乎中流大波軒然而起有失色者至馬蓮灘行館早餐又行二十里薛家鋪茶尖又行六十里宿新站予甫至雨雹其地本為尖站以邨店為行館

二十日辰刻發由大沙溝至楊家溝灘茶尖共行四十里出沙溝口抵莊浪河灘約寬一里餘分四五汊視礮伯大通兩河較廣而流不甚駛淺僅過膝攝齋可涉以弁勇十人左右掖輿而行李副戎裕大令相從渡河就淺避深輒以鞭稍先導視其色若不勝惴惴抵平番進北門至龍岡書院見裕李兩君始知前數日有馬夫溺于河每歲溺籍約有四五十人其詞吞吐疑鬼疑神皆以得濟為幸水懦民玩余殆不免玩視之矣

廿一日辰刻出平番南門三十里至大通驛尖凡四度經此矣

驛之西有神泉上構一亭其額係名經閣三字此次始諦視得之究不知其取名之義也飯後行四十里青寺茶尖宿紅城堡與中得二絕

廿二日辰刻發四十里鹹水河尖四十里俞家灣宿

廿三日辰刻發三十里朱家井尖又行三十里出沙溝口至十里店茶尖溝中為石峽出溝即望見黃河相隔一牛鳴地地勢由高而下若逢大雨山水暴注頃刻可赴洪流從前甘州某太守之子為波臣所召即此地也河濱本為通道積雨之後河水盛漲繞一土堡之後沿山麓行漸遠出河干抵官廳稍坐即回署

六月

初四日今日同僚公宴府縣為主設席於小西湖崧帥因雨傳

命展一日通明日同師張錫江賓殿珍談蒙九吳柳同約遊
五泉山則專為鄙人而設遣伴走告之適展兩日以初七為
期

初五日午後赴小西湖之約自秀成門出西關過城濠渾流甚
急當即為雷壇河濠上木橋建閘庀之梯高而陡約行二里
許又經一小橋兩旁石欄右臨黃河隔以長隄隄之內蓄水
為渠即所謂小西湖也兩岸碧柳垂隄清淺無波菱葦蕭瑟
湖北岸有龍神廟崧帥暨司道同集於此何方伯出七律兩
首七絕十二首微和請以異日稍憩汎舟至南岸經來青閣
又過一茅亭猶記其楹帖上小山承蓋下大河前橫泊臨池
草堂之下即布席於中日晡天微雨散席仍移船至北岸絡
繹進城還署暮色蒼然矣骨董嚴姓國民也屢以鼻烟來嘗

試皆舊瓶新烟所謂十三太保者以多為貴尤下劣今日送
四瓶其兩瓶三角如觚形每瓶約重半斤外籤此烟正色蔡氏家藏
云云已數見不鮮惟瓶底有小紙云蔡怡豐選莊老舖在白
橋街三多里一在大新街似尚非廣鼎細評其味亦尚不至
蜚鼻連一小圓瓶約重六兩以三十金得之

初七日大雨如注五泉之遊改卧龍閣

初八日昨黃庸訪以

高宗純皇帝宸翰一冊見示自癸

亥 登極至 歸政共六十一年每年元旦詩一首內己巳
一首未全庚午至戊寅缺九首首葉首行題 御製詩三字
而前有春帖子一葉亦自癸亥 登極起僅至丙寅共三年
而止首行題 御製詩亦同疑本為兩冊元旦為一冊皆七
律春帖子為一冊皆七絕兩冊互有竄亂又失其一所謂雜

之則兩傷也面葉有五福五代堂古稀天子寶檀木夾板面
為雲雙龍底為雲蝠雕鏤精巧非內府無此裝池也即作
一函詳告之校語石一卷

初九日校語石第二卷甘肅一則訂正踳駁又補纂兩則以近
所見石刻裱益之

初十日校語石第二卷畢

十一日得張瑄圖刺史函秦州玉泉觀碑已拓竣

十二日補撰語石一則

十五日校語石第三卷畢

十六日校語石重改定造像二則撰隴西襄武書院一聯仰止
夷齊孺立頑廉清風可即百世蔚成節魯智創巧述絕學兼
綜五洲又顏曰音嚴津逮

十七日張瑤園紀綱送玉泉觀拓本來內康熙中副將李公修廟碑駢拇指也

十八日校語石第四卷畢隴上新見諸刻頗有增加

廿三日幕中潘謝兩君吳經才以品學兼優電薦甫達西安接書即至窮形盡相如鑄建鼎以同鄉之誼優容一載餘矣此次回省即餽贐而辭之

廿四日清晨忽聞和卿棄其行李藏主考巡捕張仲樵車中不告潛遁駭極其事不必深求廡恥埽地矣

七月

初一日校語石竟第六卷前日成縣岳廣文函來為搜得乾道王子直題名政和五年重脩利澤廟碑嘉定八年孚澤廟賜額碑皆孫趙所未收

初二日校語石第七卷畢

初六日校語石第八卷畢作七律共六首

初七日黃應訪贈勞薪錄四冊河湟撤回之變參贊戎幕時公
牘也此老胸中有鱗甲

初九日校語石第九卷畢

初十日受軒丈以薇垣卽事詩八首微和先登前韵兩首報之
伴還又函示雨窗東贈詩一首新作苦雨有感各一首此老
婆娑興復不淺校語石第十卷畢原分卷次第多寡不勻分
第三卷為二并六七兩卷為一製作定今此間無好刻手塵
封篋衍以俟異時之覆瓿耳

十一日枕上和方伯詩五首

十二日語石裝訂成四冊敘目一冊燈下繕檢為焉亥亥尚未

廓清非重校不可亦非手校不可

十三日銓下作七律一首

廿六日午後何方伯飭吏來云咨送之錄科冊皋蘭虎文煥陪
州花廷獻皆回生應扣除另造冊溯自光緒三年左文襄奏
定章程回生每兩科相間一科并入大肄取中一科另編良
字號滿二十人中式一名二十餘年休養生息讀書入泮者
漸多亦頗有能文者皆不領另編號轉為一名之額所限報
名時不肖聲明學官不察而詳府府與縣又不察而詳院此
其所以誤也

廿八日覆校語石一通

八月

初二日午後得丞午電蒙 恩留任待罪年餘涓埃未報聞

命滋懷隤越足虞聞各省補放者惟浙鄂皆報滿伯葵佩鶴古惟三公亦留任

十七日岳廣文來賣至拓本一大箱共宋碑十二種題名六種又有明嘉靖杜甫草堂詩則駢排指也吳提世功保蜀忠德碑銘高丈餘煇煇鵲負額正書在碑陰下有御璽中間修政殿書四字吾鄉韓靳王碑亦如此但為選德殿耳即以一通贈何方伯還書索韓碑為配請以異日

二十日燈下寫石屋洞造象目皆宋咸平刻共五十九通廿四日優貢頭場局門後無案牘開篋出庚辛所得拓本理董之即手自著錄度龍以來難得此一日閒也

九月

初一日明日揭曉之期過午即赴棘闈在西門外另為一城先

見崧帥方伯廉訪及內外提調監試各官在監聽堂小坐傳
例填榜自第六名至末副車另為一榜既畢各官稍休息晚
膳後始寫五魁崧帥如師丹之善忘謂晚膳後始寫榜一氣
呵成司道再三請不可候至篝燈始同入內簾兩主試出衙
鑒堂升坐居中督臣在左學臣在右司道左右列坐簾官在
後共正榜四十二名內新疆耒左卷二名回生一名副榜六
名優生盧應麟賀建勳皆獲雋默計遺珠雖不少尚稱拔十
得五惟蘭州府學李繼祖誤中副車不無惋惜鄙人極盼周
希武秦州得解首及拆封唱名則河州鄧隆也買王得羊乞
酒得漿差為快意回署已交子刻第三名副榜陳潤本副榜
也撤去之易李桂蓉第四名會寧縣學訓導優貢生張建勳
馬積生前輩亦欲易一人商之崧帥躊躇未允鄙人謂張訓

導在教官中不可多得副榜慰情勝無亦可令其稍吐氣遂留之

初二日通渭縣詳革洮州增生趙馨蘭既不照例與洮州廳會詳又誤為廩生即使罪有應得亦須查明後褫革以詢崧帥非但批准且嚴治餘罪此等公事直是無所措手新中式十六名舉人蘭州府學優廩生張治來見鄙人觀風所取第三名第一即詳首鄧隆第二盧應麟也三名居然皆入彀

初四日午刻赴鹿鳴宴至督轅先見崧帥兩使者繼來脩司道以下各官謝恩畢始入宴兩使者席居中督臣左學臣右司道府縣兩旁列坐新舉人在堂下樂作行觴略坐即退至後堂釋朝服回署

十七日得辦卿心葵兩緘女兒於前月初八日產前胎氣攻心

患嘔吐產後氣急不續約一時許呼童便甫下咽即不語搖
頭兩次診其脈已無息不及延醫不及服藥延至酉刻遽逝
此真禍從天上來聞未終幅不啻疾雷之驟下悽獨餘生慰
情勝無僅此一女從此所生骨肉靡有孑遺流浪名場固為
癡絕還我初服亦復何有好懷惟恐室人知別起波瀾雖放
聲長慟不敢固哀所謂死別吞聲也即作輓對一聯寄心葵
云怕尔毋傷懷慘極吞聲似此殘年安得人間千日醉從阿
兄偕逝愁遠才影嘆余薄德并無曙後一星孤此旬日內心
神恍惚舉措失常卧後心驚肉跳早知其不祥矣

十月

初二日蘇皖同鄉約游五泉山出南門距郭五里至山麓山門
為崇慶古剎由左繞登山坡山半有門曰青霄直上其上為

地藏寺文昌閣其下為土帝祠祠左側有摸子洞啟鍵而入黑如漆倚壁有泉一泓土人云摸索其中得石為男得瓦為女讐言也西偏峯頂最高處有樓閣詢材官為三教洞設席於武侯祠土木之工尚未落成暮色蒼然始歸署

初十日兩日寫華岳廟目錄共碑刻題名不及二百通

廿二日張鐫江大令遣其子仁壽來受業以登壇必究十函宋寧州真寔縣承天觀碑新修顯聖廟碑為贊二石皆在正寧縣

廿六日實殿珍大令餽金絲絨褥腰以漢裴岑紀功碑唐姜行本碑此暮夜之苞苴也然不能卻有餘愧矣錄湖北東湖縣三游洞題名畢共十四通相緣使郭親自披榛搜得者內有歐陽文忠黃魯直兩通可寶也

十一月

十二日汪栗庵大令自敦煌拓寄唐索公碑其陰楊公碑李大
賓造象其陰乾寧再修功德記經洞大中碑皆六分元莫高
窟造象四分皇慶寺碑二分皆前所已收惟武周工缺柱圖
一李君□□□龕碑聖歷元年歲次戊戌伍月庚申朔拾肆
日癸酉無撰書人名李君下似莫高窟三字窟下似舊字屬
龍蹟上下均泐年月後一行敍李氏得姓緣起亦似有失拓
此碑文章綿麗筆法遒峻諸家無著錄者賴汪君得見之可
感也又舊佛象一幅所繪係水陸道場圖絹色黯黹丹黃慘
剝惟筆墨出於俗工尚不甚古極早為明人之筆又寫經四
卷皆大般涅槃經筆法遒古確為唐經生派紙色界畫與日
本估舶者無毫釐之異通知唐人經卷中東同一流傳特以

震旦重遭劫火消磨殆盡敦煌僻在西荒深山古剎宜其尚有子遺聞此經出千佛洞石室中室門銘鐵灌之終古不開前數年始發鍵而入中有石几石榻榻上供藏經數百卷即是物也當時僧俗皆不知貴重各人分取恆介眉都統張又履張筱珊所得皆不少大中碑亦自洞中開出此經疑即為大中寫本也栗庵信自述其所撰楹帖云夏無酷暑冬不奇寒四季得中和景象南倚雪山西連星海九州尋蹤漬根源非俗吏之吐屬也

十五日春明十載雖至熱蘇不繫厥肆必月耗俸錢自度罷未嘗得片紙隻字前月南街一荒攤送舊書來雖無可采購錢遵王牧齋詩注四函以勸來者今日復得宋玉叔安雅堂集一部汪栗庵所寄莫高窟李君龕碑今日復審之首行碑題

下有首望宿衛上柱國燉煌張大忠書十三字但無撰人耳
十九日午後孫伯南王泰馨汪星臺自家鄉偕來由滬輪達漢
皋再由火車達確山三人共一薄笨車至西安又值兩廠車
度醜迢迢七千里未帶一僕可謂能耐勞苦與和卿之氣體
居養已有霄壤之別入境不知未嘗投刺地方官尤為難得
帶至仲午一函寄貽套料煙壺一事明刻揚子法言三冊江
甯緯刺史一函新刊其愛女湘芬遺書兩種算術詩州各二
冊吾吳之閨秀也

二十日得鈍齋函並拓本十七種未藏者半已得者半其中如
廣元明德武成兩經幢嚴武所書光福寺楠木歌舊得巴州
各拓獨少此一通可補闕章皋碑巍然巨製鍾紹京殘碑新
出名跡皆可寶

廿二日得康吉函知咄彼一章沈旭初觀察所贈以毛詩一部
為聘室人以三君之來無女兒一字啟視所寄物非其手跡
知有變向余查詢聲淚俱下余不覺噉然長慟遂不能隱相
對撫膺

十二月

十四日閱邸抄鈍齋臨行甄別教職保五人勅者七人此間可
勅者尚浮於作者之數媿吾友遠矣轉瞬新年統符又換介
侯為撰一聯曰采白和甘學宜有質整齊嚴肅政貴同文中
間藏甘肅學政四字枕上觸機昨夜得五聯今日復成三聯
錄於左以見文字結習意風識浪觸微塵而即起不自知也
茶苦薺甘學有心得 晚端視肅政以禮成

上林甘泉學樹馬揚為則 雖宮肅廟政觀文武之成

風雨和甘學倖素齋 春秋溫肅政協鈞衡
微為苦宮為甘學宗蕭選 聰作謀恭作肅政衍箕嘒
學如飛衛甘蠅善射 政致越裳肅慎來賓
學笙節亨惟甘得吉 政端身教不肅而成
農澤灑甘學如雨化 漁者宵肅政乃風從
學窺三百六度證以甘氏所說 政成七十二君禪於肅然
之山

十五日枕上續得枕符二首

稼穡作甘學為嘉種 天地始肅政肇履端
甘露鄭漿學工樂祝 肅霜賁酒政侑觴行
廿六日錄梵音洞造象目畢共十一通又錄括蒼雁宕諸山金
石目括蒼十通雁宕廿五通皆祝年文所貽也

三十日純齋所貽趙懿簡碑蔡元長書也巨幅不便臨池欲付
裝潢邊微苦無良工歲晚務閒以半日工夫自剪裁之全碑
共三十餘行篆燈始畢偶至介侯室視案上正自裝柳誠懸
李西平碑相視莫逆有此師不可無此弟

甲辰正月

元旦旦刻即赴 慶祝宮朝賀禮成至 文廟先謁 大成殿
次詣 文昌宮

初七日蔣若所贈蜀石刻著錄畢以宋天禧壁州龍興寺佛殿
記為最精可追陶長史館壇碑

初九日得鳳石函去年王濟生同年得學士因言官以翰林院
擁擠疏請添三品二員六品四員以資升轉故有是 命六
品兩缺尚未奉明文若論公道鄙人可轉一階匪我思存聊

樂我員此詩可以斷章又有憂時之論言二年之內必大亂
鳳石從不作激烈語此言胡為乎來哉杞人之慮益切矣

二月

十六日起馬赴羣昌歲考伯南泰譽子沂皆從星台留守午初
行出西城過雷壇河至二十里鋪茶尖又循河山行三十里
峰巒叠起山勢漸合即抵阿干鎮矣行館在街盡處中隔一
溝度一小橋而入與中得兩律

十七日卯刻登程嵐霧霏衣春寒砭骨御重裘尚不溫二十里
登關山嶺絕頂烹茶眺望步行半里許復乘輿下坡行絕壑
中流泉交灌塗泥蹉跎難行十里白屋驛換馬入沙泥州界
又二十里遇上中鋪至下中鋪夫飯復行二十里度白土坡
又五里王府莊又五里至沙泥城即以分州署為行館得七

律一首

十八日卯刻登程約三里餘自高坡曲折馳下平曠開曠流泉
縈帶始知沙泥城在最高處共三十里新店于尖午後行三
十五里黃毫溝茶尖又二十五里至狄道州進城仍宿狄道
州驛

十九日寅刻即起日出登程五十里至窰店尖飯後行三十里
至清平去歲於此設茶尖今年改於前五里小關山麓據號
房所開路程單自尖所行二十里為石板溝門自此至清平
十里中隔蕭家鋪詢之土人清平有上下之別自下清平至
上清平十里中間不言有蕭家鋪非考圖經莫能詳也越關
山嶺凡曲折二十五里而達渭源城仍以社倉為行館連日
供帳尚不惡今日晚餐尤精潔遂次得詩四首

二十日卯刻登程五十里至首陽城尖飯後二十里鋪茶尖又行二十里達鞏昌府城即進城至貢院

廿一日辰刻謁廟講書觀者如堵場回報放告收呈數十通皆請旌請頂作七律一首

廿五日薄暮發歲生案學官拆號呈名單取古者皆前列惟備取第六名會賓親光鑑竟向隅查落卷為泰馨抑置三等並無大疵又查昨日覆古卷經營甚至非補錄不足以慰之吏云物議可畏予云人才不可屈問心無怍何恤人言鄙人執其咎可也即命懸牌提附一等末一體招覆

廿六日作七律四首

三月

初二日去年科考取進幼童常克辰此次古場正場毫無進境

以是知州角之年遽青其杙亦非所以愛之

初三日上巳客中佳節祇增悵怛作七律二首

初四日已刻發落生童畢答拜羅太守來時草木尚未放青今
桃杏華矣得詩兩律伯南泰馨登鍾樓歸云洪鍾一口係宋
崇甯中刻官斯土者但知拓五嶽真形圖有宋鍾而漠然若
無觀可慨也即命工往捐之

初五日東裝南赴秦州已刻出鞏昌東門二十里鋪茶尖四十
里鋪宿仍以村店為行館後枕土岡前對高嶺各築土堡其
上風景如昨而齒則又加長矣作五古一首

初六日辰刻發過麻黃灘涉渭流三四處二十里至趙家梗子

或云謝家堡村店稍憩自鴛鴦嘴渡漳渭二水巨流縱橫皆有長

橋可涉又自光祿坡登山下至車家明茶尖沿山丹河東行

共四十里至寧遠城進西門宿縣廨得五古一首

初七日寅刻即起登程自五里鋪度高橋村居榔比共三十里至樂善鎮茶尖樂善鎮一名樂門寧遠轄鎮首屈一指稠密過於城市自此二里至小樂門即為伏莧界共二十里尖於磐安鎮飯後自鎮行二十里為伏莧縣西三十里鋪莧茗林息又沿朱圉之麓行三十里至伏莧縣城大像山下虛攝臺前環而觀者如堵牆兩度按部皆以輿擁不得前未登大佛閣山靈其笑我矣進西門宿縣廨臥室之外一小園雜蔣花木去年宿此吳篴階大令收拾幽雅今年綠滿窗前草不除知主人之未始窺園矣逢次得古今體詩各一首

初八日晚霧如煙吳濛欲雨主歌白駒之章客辭南浦之賦卯刻出西門過龍神廟十里登坡冒雨至山頂與伯南黍馨子

沂同憩邨舍徘徊稍久雨脚漸密巖梯詰屈泥滑如油踉蹌
達山麓此山土人不知名頗高峻升降共三十里至關子鎮
尖飯後行五十里秦州之六十里鋪尖三十里鋪宿作七律
一首

初九日辰刻發行三十里達秦州同城文武迎於西關頭道伏
義城進城至貢院以後兩日皆 國忌今日即謁 廟明日
即開考午後雨勢甚驟檐溜淙淙不歇過未刻始稍霽即赴
頤宮丹墀積潦不能行禮改於殿門內後檐下講書既畢即
歸署循例放告無一張紙兩年來所未有政簡刑清足知刺
史之善政矣作五古一首

十二日生正場寅初即出點名立夏伊通尚御狐裘甚美氣候
之殊也午後有秦安生員於交卷時當場為童生魏養怡行

賄即懸牌斥革並將該童扣考其詞云今日歲生正場有西
重三號秦安生負膽敢面交號房字條內有童生魏養怡取
進入學送銀六十兩等語迨經傳其上堂質訊又敢在院役
手中搶吞入腹希圖滅迹公堂之上衆目昭彰似此肆無顧
忌實屬不法已極該生員著即行褫革該童生魏養怡仰提
調秦州知州查明扣考以肅場規而昭炯戒旋查號印簿該
生為魏作霖

十八日發二場革榜秦安伯南薦至六七十本痛刪過半尚調
三十一本兩當祇有十四本乳目臍口望而卻步請秦督為
政調九本若易地以觀則累累遺珠高於脫穎者不止一等
寔為難口毋為牛後以地限額安能得士哉

十九日奉到禮部劄遞減學額自丙午至己酉為一科壬子為

二科此一歲一科內學權尚完全無缺

廿二日已刻發落生童畢王觀察張刺史招飲水月寺午後出北門偕觀察暨謝太守蔣游戎同游玉泉觀先坐工部草堂小憩又有李杜祠并祀謫仙偏覽壁間碑刻以次至蒼頡祠仙人洞洞中右壁有元羽士梁志通詩即屬道人獨一通登明眼亭縱眺前游土木之工尚未畢此度來游則丹碧煥然觚棱鬱起皆刺史功德也下山游三台寺在龜峰之麓沿城行十里由略約渡河始到陶方帥遺愛祠新落成其旁有真武殿殿外有磨鐵洞洞中楹聯皆以磨鐵設喻詢謝太守亦不知出何典記視日影已昃矣知張刺史盼已久即渡河至水月寺背北城面南山前有方池盈畝面水開軒池外長堤環植楊柳堤曰陶公堤柳即曰陶公柳蔽芾甘棠勿剪勿伐

於方帥見之矣牡丹已盛開深色一叢大如盃紫如玫瑰燦爛可愛花下開博暢談至深昏而返

廿三日辰初即登程去年由東道自劍河嶺涉馬家山至石佛鎮今年改由北道涉羅峪溝出城共五里而至間鋪自此登山山皆積土無寸石然頗高峻五里高家山莊又五里營防嶺有汎墩五又五里鵲喜山又五里自楊家莊至崔家石灘下嶺渭水橫其前架木為長橋二塞土捷薪寬不盈尺行其上岌岌欲動遇河行五里為山羊川又五里蒲家莊一路卽巷曲折人煙不絕又涉胡盧河行五里至石佛鎮失午復行二十里革家堡茶尖自此迤邐下山又二十里至秦安縣進南門宿縣廨見張大令若有不豫色然詢奴輩知城中喉疫傳染甚速大令於一月之內殤二女一媳其子在床尚未愈

也今日有一僕至石佛鎮辦供帳即時病倒從者咸有戒心
伯南以蜀中所得西藏小青果見貽云可避喉疫作七律一
首

廿四日已初登程出北門三里亮家拐半里由夫子山過天開
石鏡羣峰四合嵐翠雜沓胡盧河出其下誦前人空山無人
惟石嵯峨之句不啻再到畫圖中矣又十里何家坪淪茗於
蔡氏祠堂壁間有劉讓老留別詩四首記其一聯云此去安
知非久別無才原不戀微名此老情見乎言矣又行三十里
至郭嘉鎮宿途中得詩一首

廿六日今日奉至馬營為一站以殿珍在通渭適子之館不至
下逐客令遂改為兩日程已刻始發祇行二十里殿珍迎於
東峽口煮茗略談又十里抵通渭縣城進東門至縣廨盡謝

他客惟請殿珍便服談甚久作五古一首在秦州時論文判牒之暇輒課一詩隨地隨時共得八首補錄之

廿七日元刻出西門自舊店子至新店子共二十里登四架山又十里下坡為晉潁川設茶尖於此下與稍憩行五里涉何家坡山半有巨石張口如竈土人謂其形似鵠呼為餓老鵠峽鵠為水產不當在高山之麓且賤鳥也作五古一首以前洗之又五里過菩薩樓又二十里至馬營宿馬營慶市奉綢密此半月內通達會期道路肩摩觀者如堵

廿八日元刻發自馬營至紅土窰有二道與幕中諸君子分道而馳彼由大路余由小路大路連去歲亦如此殿珍送於上城外河濱十里登腰兒山一名牛營山又十里下坡其地即名牛營店南頭通翠昌又二十里康家堡茶尖又二十里至

紅土窰宿賴春亭在安定知其必達遲果昨日已先到矣見於行館得詩二絕

廿九日昨夜大雨如注研旬達旦過辰刻始開霽泥行二十里李家堡茶尖與夫緯夫如豕負塗牽曳而蹟者屢矣惻然憫之又二十里馬家鋪地漸白又五里至景家店市衢寬廣依然坦坦康莊矣今日號為平地然十里五里一村一堡兩頭必有山溝深數十丈建瓴而下折旋而上雨後牆傾泥滑如油亦殊有臨深之恐又十五里抵安定縣城最後一溝其下即為城隍更深陡進城至行館廣東高要縣知縣安乙垣同年蔭甲此邑人也其子名晰前年科考取入學去歲乙垣歿於海南安生甫於月內扶柩歸墨絰來見至里其父羅陽遺愛詩一冊蓋乙垣偶篆博羅頗有政聲也得七律一首

四月

初一日晨起雨漸霽春霞先來話別送於偕樂橋行五里即渡董家河登坡為青嵐山一名晴嵐峪俗呼為清涼山又二十里而至其顛尖於村店下坡行十里周家坳又十里始至山麓山溝有土橋跨兩岸橋東一碑題永定橋其西岸之右亦有一碑築屋覆之歲久泥深僅露碑額下一永字屋亦祇高尺餘雖侏儒亦須偃偻而入矣又十里至西鞏驛宿途次得七律二首

初二日已初始發驛程僅六十里又平坦午刻即至難免喘已四十里矣同鄉蔣公度為會寧令自城來遙見於邨舍又行二十里抵會寧縣城公度迺進城又見於行館館中補壁有輦轎包安吳楹帖吾鄉人究不同於俗吏

初三日辰刻出會寧南門過三里坡即入溝道山腰高處有官路行二十里至張城堡茶尖又二十四里至崔家所尖又四十五里至青家峽公度已先到談良久明日新臺藩台吳福漢方伯過境送客亦所以迎客也館宇舊祇陋室三楹湫隘頽敝不可以居公度拓地新建上房三楹甚軒敞翼以左右廂前半月工甫藏作七律一首以落其成

初四日辰刻發曲折沿溝倚山行三十八里至界守鋪村居略憩前驅報吳方伯已自尖所飯畢西來五里過王家河見於途次又行十里至高家堡尖地為靜甯州界午後行十二里過孫家溝即登祁家山逶迤升降共二十五里下坡為八里鋪又行五里過長原河無橋緯夫寨囊以涉進西門至行館秦安當場行賄之革生魏作霖在門外遮星乞恩瞠然老矣

秦州所草一少年也閱其詞始知該生歲考實未來即命其姪魏養怡捉刀李代桃僵行賄雖非其罪催倩則咎由自取也聞郎鈔吳綱齋疏請開去南書房差使回籍養親終歲抽替不獨鄙人有餘愧即吾子修同年亦愧其子矣

初五日辰刻出靜寧東門文武皆送於三里外李家店沿山左麓十步一曲入十里過平家河又三十五里至神林堡尖所經司家河即靜寧縣神林屬隆德縣同鄉盧義侶署縣事自二十里鋪城未進飯使行二十五里至紅心鋪茶尖即隆德之西十八里鋪也進城盧大令又見於行館談省中郡中近事相對太息途中得七律二首

初六日己初出東門十五里楊家店已至六盤山西麓登山十里過龍千鎮鑰坊為絕頂又五里漸下至廟兒坪在武廟茗

蘇三度登此山矣前年自慶陽回過此正在初冬草木零落
此時雜花布谷垂柳扶疏山色泉聲步步引人入勝又十里
至山麓又十五里抵瓦亭驛宿署固原州事饒同鄉金承蔭
自州城來逆途次得七古一首枕上改成之

初七日辰刻發二十里至蕭關口次於武廟像設傾陟棟宇穿
漏前兩度來似不如此又五里蒿店又二十五里至安國鎮
尖高隴三大令自郡城來見於行館飯復行四十里至平涼
府城進西門至貢院見瑞仁團太守金少逸刺史得詩一首
初八日已刻謁廟講書畢循例放告收呈二十餘通補錄古今
體詩四首

十六日兒部今年抵平涼姬人亦偕來姓劉氏年廿二歲燕產
也沈紫梅觀察在通水道任所置婢阿和於揭曉後進見言

途次遇雨極勞頓自咸陽以西通館授餐皆地方官供帳醴泉縣干大令上海同鄉尤殷勤可感也

十七日調度固原三屬重生平遠額五名僅一人向隅而不通者轉有四本蜚喉刺吻五雀六燕無可軒輊閱至一卷有王孫之賈云云伯南泰譽皆以為無以尚之矣然古人如尹公之佗公罔之襄皆以之字為語助可增可減文理與衍巨愚未敢妄議誠可噴飯矣

十八日晴嵐借得崆峒山志嘉慶己卯知郡事海鹽張春魁纂山中有游師雄題名賢乘寺有金大安銅鐘銘閱之頗欣然
規往

十九日會榜揭曉君九獲隲蘇省惟張鴻都中舊識王慎賢亦知其姓名甘省聯捷惟皋蘭王烜河州鄧隆

二十日午前發落生童申刻同城文武招飲於道驛江筱棠觀察出示銅印其文云臨洮路第二將汪家族同管印據云是宋時官印尚當詳考

廿一日己刻啓程四十里鋪尖飯後行三十里宿白水驛

廿二日昨晨晚發正當車午與中揮汗今日寅刻即起卯初行二十里花家寨茶尖又二十里尖於王村飯後行三十里抵涇州城至貢院先見文刺史王大令再見諸廣文

廿三日謁廟講書放告新章改生童古場為二場與正場合校自涇州始舊例古場由學備卷今一律歸州縣承辦教官無須蓋印造冊所以防書斗之勒索也昨至王村見文刺史即為教官說項豈知不佞雖唯唯而州吏欲專利挑唆童生不用學印以為一切考政教官自此皆不與聞雖新進之費

亦將斯之幸不佞主持於內文刺史調停於外遷至編下冊
卷始集涇州尚少二十餘本

廿六日敦煌汪栗庵函來言佛洞寫經曾見一卷尾有大中五
年字果與唐敕書碑同時錫寫可証余前說之不誣

三十日調復童生所出論題四屬皆有不知其人者尤奇者涇
州穎考叔不知用育左而奉京班所演伐子都一齣為典要
無可軒輊

五月

初一日各屬賀節信絡繹而來陝西臨潼縣李凝叔附一稟謝
藏書紀事時謂自晁陳以來無此體例頗能道此事甘苦非
汎汎恭惟也作一啓答之

初四日孫王兩君至圓山宮訪得金大安鐘又在共池得元貞

鎮海碑物色拓工不可得

端午日發落生童畢景承差自三原來過邠州大佛寺寺僧天緣屬携至石拓七分云須從容精拓七月為期可窺全豹察其意必操量鼓而來恐奢望未易償耳伯南游崧山高顯寺歸見魏碑年月雖漫漶文字尚未泐筆意方整頗似高貞若不携以壓歸裝負此行矣

初六日 先妣忌辰途次不得行魚菽之祭違論速養辰刻自涇州啟程諸生送於北關文武各僚送於共山之下三十里王村尖飯後四十里至白水驛宿途中得七律四首

初七日辰刻發四十里鋪尖飯後行過半天油然作雲繼以雷電正在曠野中幸雨腳甫放即收輿夫疾驅抵平涼城進東關至貢院卸裝夜伯南秦營至關帝廟訪得宋天聖鐘元香

爐云鐘四面刻天尊像製作甚精据殘碑廟舊名治平寺作
七律兩首

初八日辰刻發四十里安國鎮尖飯後行二十五里至蒿店又
五里過蕭關憩武廟又二十里至瓦亭宿途次得七律八首
初九日辰刻發過六盤山共五十里抵隆德縣城宿

初十日辰刻發盧大令送至神林堡飯後行十餘里約至亂柴
鋪陣雲如墨狂風怒號從興後飛駛而來頃臾驟雨傾盆而
下僕從倉皇望門投止道左有村舍三間虛無人呼鄰啓鑰
而後入繩牀土銕停一炊許雨漸霽即首途將抵靜甯州五
里下坡為李家店但見柳隄一白車塵沒踝依舊飛揚知雨
以此間為界及抵東關金參將出迓果言望澤已久甘霖未
沛諺有夏雨隔田之說信矣夫至館天已暮途中作詩三首

十一日辰刻發高家堡尖青家驛宿

十二日辰刻發往家所尖飯後行抵會甯縣城至行館見公度出示和青家驛行館詩並吳福茂方伯一首皆步韵公度末聯云願附輶車登隴首且拋鄉思憶長干福翁云卜君他日為梁棟時至無煩扶策干情見乎詞矣作七律一首

十三日辰刻發二十里雞兒嘴茶尖又四十里天微雨至西鞏驛宿

十四日辰刻發初首途密雨如散絲正資濕潤行十餘里遇王公橋南山霧氣冥濛聯合咫尺不辨途徑風聲雨聲隨之而至頃臾積潦縱橫矣連連升降經十餘坡皆極陡峻及至青嵐山頂時已過午興夫鐮夫力盡筋疲雨勢尚厚集不復能前矣即命在村店卸裝土屋兩椽一炕一桌之外別無長物

求薪炭油燭皆不可得據從者云村農恐官不給價雖有旨
蓄亦深諱不敢出甚矣民之畏官去畏盜幾何始作備者可
誅也人夫雨行三十里通身淋漓露溼山頂高寒單衣瑟縮
如蠟皆命薄犒之俾謀一醉以禦寒僕之前驅者幕之坐車
者皆已前赴邑城獨坐無聊作七律五首不敢題於壁也

十五日晨起道尚泥濘肩輿行二里春霞以車來迓遂易轡而
乘兩騾甚健行泥涂中如組如舞二十餘里至坡頭上疾下
高坡既深且陡約三十餘折不知幾千百丈而至山麓復從
澗底渡橋超躍而過始知昨夜宿處真在最高峰雨途絕險
萬不能下此坡也既抵安定城春霞出迓見於行館午後答
拜春霞縣署在北門內三次過安定今日始望見廨門也昨
雨霽後夜月升空徘徊峰頂不啻玉宇瓊樓高寒世界心曠

神怡得一律

十六日寅刻即起出東關六十里至秤鉤驛尖飯後登車道嶺
凡三度經此矣峻極干雲赤日當午輿夫邪許而上流汗相
屬一在後者喘如牛即命停輿柳陰下稍憩始升至嶺脊遠
進行四十里仍在厓右窰洞中茶坐視壁上舊題本如蛇蚓
已模黏彫剝又曲折二十里自高馳下及至平地而已達甘
州店矣至行館楊慎之太史自省歸通過此來談途次得兩
律

一首

十七日辰刻發清水驛尖午後夏官營茶尖金家厓宿得七律
一首

六月

初一日開考蘭州府屬歲試辰刻謁廟歸循例放告

初四日童二場因大雨不息候至黎明始點名張太守李大令冒雨踉蹌而來聞河流盛漲浮橋衝斷沿河十八灘舊為膏腴之地皆為陽侯捲去人口傷亡尚未查明若干

初五日雨漸霽彤雲仍厚集聞河流漫溢東門外水已登岸十里之內一片汪洋傳統領防營正當巨浸之衝已移屯五泉山高處得繆筱珊前輩函錄示江陰後軍指揮石刻一通

初八日調覆河渭靖金四屬又童題紙甫下諸童倉皇失措面色如土河州題鄭弦高犒秦師事有讀十二犒為句者有分鄭商人弦高為兩人者又有以和戎痛抵弦高者金縣神降於華能知為競公事者僅一本有以為祥瑞者有誤為伊尹耕莘者然不能不錄取

初十日新進文童覆試以其不學無術自撰勸學告示一通大聲疾呼以警之

廿六日寅刻盥沐赴慶祝宮崧帥以下皆集壽護丈為言得京信虞山師作古張甫已請急歸河州牧趙謙進稟許藩司得賄後索賄不遂藉詞傾陷自甘與受同科請據實奏參以儆官邪聞之駭極固非不佞所敢越俎監司大員宜知自愛亦何至于此然事由本人舉發不能謂非實錄崧帥處亦通稟恐未必能達靜作壁上觀可耳

七月

初九日余遂生黃子範便服同來言張梅航觀察屬廬浙江館公產也即在館之比鄰欲以其地改建陶方帥祠堂此盛舉也固所願聞

十三日得新疆李方伯書本署之東大佛寺有金泰和年所鑄銅鐘拓一本以獻

十六日辰刻啓程赴涼州出鎮遠門渡河至十里店折北入沙溝共行三十里至朱家井尖飯後三十里俞家灣宿得七律兩首

十七日辰刻發二十里哈家寨于茶尖其地即苦水驛已入平番縣境驛之右有汎房額曰苦水防營又二十里鹹水河尖飯後行三十里至紅城驛已四度宿此矣

十八日辰刻發二十里青寺茶尖又二十里南大通驛尖飯於關帝廟午後行過高橋墩滿營出進洋槍步隊約一哨頗整肅托錦亭守尉進於滿城外即穿城營而過進平番城仍假枝陽書院為行館

十九日辰刻出平番北門二十五里漢屬郎坡茶尖下坡折而西行山勢漸合又循崖折而北沿莊浪河南山在右一峰削如片席逶迤而長峯頂狹不容趾前度來時自此瀕河行過永濟橋麓望見隔水嵐翠沓沓飛來玲瓏奇秀此次則近旁南山穿過牆內外行十五里渡河登岸即至武勝驛驛舍陰寒不敢久憩飯後即前進左山右河水聲潺湲山色葱蒨地皆五色石但寂無人烟十里始過伏羌堡又十二里過鶯窩墩對面羣峰嶙峋如墨風雨驟至踉蹌行十餘里渡河而東雨脚漸收復放輕雷隱隱然繼之遙望北山積雪皓然邊荒景象無冬無夏非親所經歷不能得此奇觀也約趨行四五里達岔口驛宿午峯同行至此夜便服來談欲送至鎮羌堡苦辭之始云奉省檄查前任裕正甫大令新開路工實非

專為送客蓋自平番達鎮羌舊有河水兩道夏秋盛漲行人
往往減頂裕大令於河東新開一路可以避水惟曠無居民
館驛亦未經始故此次仍從舊路也在省早晚僅一棉過平
番始漸冷此間陰寒慘慄重食不溫蓋如吾鄉嚴冬氣候得
詩二首

二十日卯初即起寒甚重棉不足再加一小羊裘與中假寐至
打柴溝茶尖睡眼朦朧問從者云已二十餘里矣涉兩小水
共行五十里至鎮羌堡尖飯後過河以兩牛車去輪為梁慮
其艱脆也村夫十餘人扶其兩端而後渡時旭日當空過河
即風利如翦日光還欹微雨颯然隨片雲而至趨行七里至
湘子廟烏梢嶺之麓也入廟拈香廟屋正殿三楹不甚宏敞
而輪奐尚新前制帥楊石泉所勅也瞻禮既畢羹茗稍憩即

行登烏梢嶺過界牌墩署古浪縣事申瑞元自城遠迓至此
共行二十二里至安遠堡設茶尖於此又行五里自油坊臺
溯龍溝河河中亂石如繁星又如恆河沙數五色斑斕村民
築屋岸旁其小如舟又於石罅安水碓激流淙淙搏躍而過
白楊數十株濃陰夾岸山壁渥如赫丹雲蒸霞駁不可名狀
約行七八里出山峽過河即為龍溝驛至行館宿

廿一日黎明發十五里黑松驛按陶保廉所紀行程云過此亂
流而北登坡入古浪峽南為松林山北為鐵櫃山峻阪一錢
頑石塞涂形勢如潼關函谷余三度經此詳稽道里自黑松
驛登香蘭坡五里下坡又四里闢王廟又三里釜口墩凡十
二里仍土道過釜口始入峽峽中始滿池皆葦確陶氏所言
尚未諦闕王廟前有短碣題闕帝顯聖處而廟則已邱墟矣

又十八里進古浪縣南門申大令又迎客至行館欲送至雙搭堡苦辭之乃送於北門外二十八里至雙搭堡茶火又三十里靖邊驛宿武威縣張又履同年來迎

廿二日辰刻發四十里大河驛尖飯後行十里黑泉堡再進至十三里鋪又十三里至涼州東關滿漢文武皆出迓進東門至貢院見張筱珊張又履兩君此次因聯仁甫在省張筱珊護理府事代辦提調

廿三日氣候視省城為煖無須挾纊已刻謁廟畢故告夜大風撼牖發瓦但聞庭中波濤澎湃之聲三更雨天驟寒。

廿四日合屬童正場寅刻即起寒甚重棉而出及點名畢升堂尖風刺骨益不能支又加一棉一裘昨日如夏今日如冬氣候之離奇如此起居可不慎乎

廿六日閩屬童二場坐堂號幼童共六十餘人諦觀之不少于
思于思者可笑也堂上作五古一首

三十日調復文童古浪倫生張希巡上屆未錄之縣首也此次
仍提復非但文理荒率以正場卷核對筆迹亦不符仍斥去
之平番縣首張育麟亦未錄揭曉後張又履同年來見云此
亦前令裕正甫訐歎之一紳士已在省舉於試場輿論譁然
欲控者屢矣今斥之可謂大快人心不知實張冠李戴非使
者之面如削瓜也可見一衿雖微亦有命在天下事相值之
巧有不可思議者吾輩捫心當自咎不可乘人之不幸以為
幸也

八月

初五日午前發落生童畢欲往遊大雲寺觀感通塔夏碑未果

夜束裝

初六日辰刻發涼州出西門四十里尖於永懷渠張又履同年
至此話別午後行三十二里豐樂堡宿途次作五古一首
初七日辰刻發三十里清溪堡尖午後通津堡茶尖共行六十
二里進永昌縣東關前科考往運行館一借郵店一借會館
此次宿雲川書院陳大令甫經修葺庭中老樹一枝蒼龍可
愛數百年物矣作七律一首

初八日辰刻發永昌頑石崢嶸滿坑滿谷共行六十里至水泉
驛宿實不止八十里也途次一片沙磧曠無人烟惟在水磨
關茶尖略有破屋數家而已作七律一首

初九日卯刻發水泉堡過定羌廟茶尖五十里至峽口驛尖午
後行二十五里王城鋪又十五里宿新河驛作七律二首

初十日辰刻發二十里鋪茶尖又二十里抵山丹縣城由東關
進南門自東關至西關一渠通流縈迴如帶兩岸市廛湖邊
皆種柳為藩今日本當宿東樂縣城以僕病馬瘡未能前進
與樂岐村大令商宿此黍馨聞鐘聲訪至雷壇見巨鐘一鑄
工甚古外無銘文其腹鐫字曰沙州都督索克奉為 先
亡敬鑄神鐘一口字如酒杯陽文反刻此鐘至晚唐初刻或
竟在六朝五涼時索克史乘當有致廟祝云自敦煌移來以
沙州字証之非謬言也即屬樂大令拓十本

十一日已初登程十里大佛寺樂大令至此送別即導登佛閣
大佛依山鑿石為象高十三丈閣凡七層再上一亭曰四明
樓前年到此尚在版築今已竣工無濟勝具僅至第三層即
下稍憩又行三里許渡河為弱水之東源河濱有廟倚山麓

門殿頽廢循山而上其正殿額曰弱水龍王廟像設黝然無
色階下當門樹十餘株一字排列鬱蔥甚茂以意度之當是
築室在前種樹在後蓋廟已古矣否則經始時何不縱斧顧
留此以礙出入邪殿左巨石如磐方廣盈畝赫如渚諸其上
一層為觀音堂厓側豎一碑年月已剝泐額曰觀音碑記首
有山丹衛云云明刻也再上一亭巽然高聳為闕帝閣尚未
傾圯守廟一胡僧黃衫銅箍鬚如蝟磔牽犬而出稍徘徊即
行過二十里鋪為東樂縣丞界又行十餘里抵東樂
十二日辰初發二十里架子墩茶尖過此為張掖縣境又十里
仁壽驛尖亦名古城子漢屋蘭舊址也飯後即趨行二十里
鋪茶尖又行十三里至青龍鋪又八里抵甘州府城至行館
途次作七律二首五律一首

十三日辰刻發渡弱水登下厓子前年由甘赴肅過黑水時波浪洶湧以牛車渡今年水深處不過尺許共行五十三里至沙井驛尖飯後行十里沙灘堡又十里至沙河堡宿

十四日辰刻發四十里至撫夷廳尖行館在城外署高臺縣事曹耀崐號煦初越境來遊以明日中秋佳節欲攀留一日察其意極誠遂忻然允之午後行十五里雙泉堡亦名小魯堡設茶尖於龍王廟下輿稍憩過大沙漠又行十里至渠口堡又十里進高臺縣東門至行館途次補作七古一首

十五日留高臺行館曹煦初大令餽瓜果月餅並徧犒從者可感也瓜產花穠子尚嬌哈密種今食之味不別實夜煦初便服來談作七律二首

十六日辰刻發煦初送至宣化堡設茶尖話別共行五十里宿

黑泉驛出城時遇月牙湖徐行隄上流連景光作七絕二首
又七古一首

十七日卯刻發二十餘里花牆茶尖花牆產瓜其形橢圓而長
青黃色哈密種也西瓜紅瓤不甚甘未至即有紳民出迎設於案又
有野人跪獻於道左從者拒未收負其芹獻之忱矣又行三
十里深溝驛尖飯後三十里鹽池驛宿作古詩一首

十八日今晨以道遠早起日出即發四十里雙井驛尖飯後行
四十里黃泥鋪茶尖黃泥鋪本醺土夏秋之際爛如醬缸深
可減頂此次乾燥可揚塵車行無礙又二十里至臨水驛宿
途次作七律一首

十九日辰刻發四十里至肅州城外由東關進城至貢院夜聞
郎鈔奉 上諭江南狼山鎮提兵員缺著候選道黃忠浩補

授文武通用此亦將來一掌故也途中作七律一首

二十日謁廟放告汪栗庵來函貽教煌縣志四冊殊榻一紙稱
為裴岑碑細視非漢刻似姜行本碑又宋畫絹本水月觀音
象下有繪觀音菩薩功德記行書右行後題于時乾德六年
歲次戊辰五月癸未朔十五日丁酉題紀又大字一行云節
度行軍司馬金紫光祿大夫檢校司空兼御史大夫上柱國
曹延清供養又三行云女小娘子宗花一心供養慈母娘子
李氏一心供養小娘子陰氏一心供養其幘僅以薄紙拓而
千餘年不壞謂非佛力所護持耶又寫經三十一葉密行小
字每半葉八行行三十三至三十五字不等旁有紫色筆如
斜風細雨字小於蠅皆梵文以上經象栗庵皆得自千佛洞
者也

廿一日肅安兩屬童正場夜丑寅之間忽覺有聲掀然大波起
門窗屋瓦不啻萬牛齊曳岌岌動搖從夢中驚呼于沂尚未
睡亦駭而奔出始知為地動也西人言近火山處多地震此
間南北兩山重巖寂靜人跡不到或者有燎原欲發者邪又
睹傳記大震之先必有小震不敢再睡亦即刻升堂矣

廿二日作七古一首

廿八日作七律兩首

九月

初一日作七律三首并前途次所作錄之

初二日得敦煌汪栗庵大令書寄贈莫高窟碑十通種墨稍精
前得模糊之本可以補釋聖恩李氏舊龜碑兩面並拓據云
視徐星伯西域水道記所錄缺字無幾可無遺憾矣又新得

兩通一為元碑之陰皆蒙古色目名氏其正面當有文字而
已泐一殘石僅存十一行行多者不過十三四字年月姓氏
並佚又無事實可考惟文中有聖神贊普四字贊普吐蕃酋
長之號猶匈奴之稱單于突厥之稱可汗冠以聖神二字猶
中國皇帝上加以徽號以是知為吐蕃碑毫無疑義率字寫
作卑與明政石城碑亦合裁風不在無與賞析微老夫無能
知者矣

初三日科生二場堂上作七律二首

初四日夜奉吏部文蒙 恩補授國子監司業距通籍十六
年留館厯俸亦十四年有奇矣

初五日夜敦煌王廣文宗海以同譜之誼餽唐寫經兩卷畫象
一幀皆莫高窟中物也寫經一為大般若經之第一百一卷一

為開益經殘帙畫象視粟庵所貽一幀筆法較古佛象上有
貝多羅樹其右上首一行題南无地藏菩薩下側書忌日畫
拖四字次一行題五道將軍有一人兜牟持兵而立者即其
象左一行題通明和尚有僧象在下其下方有婦人拈花象
旁題一行云故大朝于闐金玉國天公主李氏供養元初碑
版多稱大朝然不當姓李氏此仍為唐時物耳公主當是宗
室女何朝釐降攷新舊唐書外夷傳或可得

初六日辰刻發落生童畢申刻赴公宴作五古一首

初七日夜敦煌王廣文來云莫高窟開於光緒二十六年僅一
丸泥嗟然局鑄自啟豈非顯晦有時哉

初八日辰刻發酒泉自鎮道以下送於清勵樓二十里鋪茶尖
臨水驛宿作七古一首哀徐總戎占彪雖未足比杜陵詩史

發潛闢幽庶幾古之遺直焉

初九日黎明即行雙井子尖鹽池驛宿共行百里作七律一首
初十日卯刻發深溝尖黑泉驛宿

十一日過辰刻始發宣化鋪茶尖共五十里至高臺縣進城宿
行館

十二日高臺學宮舊已傾圮地方紳士鳩資修葺初亦捐俸
百千頃甫落成未時即請度止約歸途瞻仰今晨辰初始起
即先赴學宮在行館之東

中間隔縣令兩署

曹大令隨同行禮畢

周視兩廡及名宦鄉賢祠名宦粟主九漢霍將軍去病為首
而無衛青明初有馮勝而無傅友德其餘七賢皆本朝人文
有陳文恭宏謀尹文端繼善武有趙良棟張勇鄉賢祇四人
一為 紫光閣圖像甘肅提督閣師相其三人姓劉者居二

皆非達者則此邦之寥寂不自今日始矣文武送於東郭外
雙泉堡茶尖撫奏宿共行五十里今日本當歇沙河因桑梓
之誼為譚琴留一日棋烏梢嶺湘子廟楹帖一聯錄後
三疊陽關玉笛吹來且莫問落梅折柳

一封輶傳烏松仰止儼如見羽蓋飄輪

十三日辰刻發譚琴送至沙河驛話別共行六十里沙井宿作
五律一首

十四日辰刻發二十里下厓子茶尖渡黑水進城至貢院

十五日我生之辰已刻謁廟即在貢院之西一雞飛地宮牆
面城城上樹木闕中為龍門兩字闕之左為文昌魁星兩閣
講書畢回署放告未收一呈午後撰謝恩揭稿

十九日生頭場張掖生員戴尚賢以年貌不符欲驅出該生力

辨為正身細詰之始知該生年四十六矣冊填二十六又誤有鬚為無鬚此學書之過也使者所憑以稽察槍替惟此年貌冊通同虛設所繫非小因將學官懸牌申飭學書交提調官責懲

廿六日辰刻發落生童畢

廿七日府縣以忌辰堅留一日夜劉太守招便飯屢卻不可至則依然盛設查郡志下龍神廟此間龍神廟有三廟有西夏時黑河龍神救其陰國書廟在城西十里弱水之濱即肅州往返郡寮送迎之所也命工往拓得十餘分不加推禮正面字尚可辨澹若無墨其陰則一片模糊為之爽然若失

廿八日辰刻發四十里古城尖飯後行三十里至東樂宿

廿九日早發至山丹縣城尖渠歧村遠接二十里又見於行館

以所拓索允鐘款見貽用朱文其惡劣與黑河教同違傲無良工非自傷拓手不能得善本也飯後行四十里新河驛宿今日初出東樂城有張掖古渠渠農民告農官李鶴齡惡蹟多端民不聊生遞呈者共四五人龐眉皓首皆耆老也雖無斧柯似此狼莠頗思鋤之

十月

初一日黎明即發四十里峽口尖峽中產石鶯其色黝然石質似研材張兩翼有紋如瓦腹微凸喙尖而下鉤尾似翦儼然如燕之將翔也據云產崖洞胎石中剖而出之可療目疾難產亦可催生以千五百文購大小兩枚其殘蝕不全者值稍賤午後五十里水泉子宿以村店為行館

初二日四十里水磨關茶尖又二十里至永昌縣城宿雲川書

院陳少田大令於晚餐後便服來談餽岳陽樓記拓本

初三日辰刻發陳大令邊送三十里至八壩尖所飯後又行三十里宿豐樂堡已入武威縣境矣

初四日黎明即發涼州四十里鋪尖飯後行四十里抵涼州府城進城至行館甚精潔即邵察宴集之地

初五日辰刻發三十里大河驛尖又四十里靖邊驛宿

初六日自靖邊以西天氣頗和煦今日驟冷三十里雙搭堡茶尖又三十里進古浪縣城未至數里微雪飄灑及至行館玉龍旋舞階除皓然堆素室廬偏仄惟見中雪堂大令

初七日辰刻發踏雪過古浪峽堅氷積地寒風怒號真有飲馬長城窟氣象申大令送二十里班荆話別仁人之言藹然惻怛今之循吏也又二十五里至龍溝驛宿行館在萬山中積

雪千仞寒氣凜冽重衾不溫

初八日黎明冒寒即發三十五里過烏梢嶺晴旭東升寒氣轉稍飲即至相子廟茶尖恭獻楹帖又十五里鎮羗驛尖飯後趨行五十里至盆口驛宿出省西行從煖處來至此始覺寒今東歸從寒處來至此又覺煖矣今日入平番縣境

初九日辰刻發四十里渡河至武勝驛尖積雪漸消山骨刻露寒厓枯木如見倪迂畫幀飯後行三十里抵平番縣東關進城宿枝陽書院明日 慈聖萬壽以途次照例未住行禮

初十日已初發出南關其地濱莊浪河渡河而南有兩道一出大沙溝迂道十里地稍平坦去年由此一出小沙溝一錢羊腸兩厓崩劣夏秋山水衝發建瓴而下人馬皆至滅頂即沈文忠公遭難處也今冬寒水涸可無慮還由此道十里升坡

崖壁土皆赤色盤旋而上愈陟愈高約十里始登絕頂稍折而下為楊家灘即與大沙溝分道處烹茗稍憩自此行五里始下坡至新店子宿共行四十里實有六十里行館湫隘僅容一榻

十一日辰刻發行兩山間峰頭殘雪未銷寒氣頗甚五十五里至薛家堡茶失又行二十五里出山口至馬蓮灘宿

十二日辰刻發渡浩疊河昨夜枕上聞河流鞞轂有聲今日臨河以巨絙曳舟而渡視水作深碧色滔滔挾冰稜而下勢尚洶湧冰溝峽中積雪未銷流泉寒洑馬蹄滑遶甚艱於行幸蔣蔭珥所添六騎甚得力渡河涉嶺輒下騎扶掖非僅飾觀瞻已也自龍溝相送至此已五日程矣適西甯鎮張雲亭軍門遣游擊趙寶林率馬隊一哨來迎可以番休矣既至冰溝

驛行館即簿稿令歸堅不肯去云奉令送至西甯郡城非得
張鎮軍名刺不敢返也飯後度一大山升降陡坡共三十里
見一驢墜崖斃於巖下山迴崎嶇可知矣下坡為羊腸溝一
綫曲折又約十里至老鴉堡宿

十三日已初始發沿湟水行波聲喧聒笙竽競奏兩岸層嵐環
抱紺翠萬狀邛莊絡繹牆隅簾落猶有霜葉未脫行二十五
里高廟子茶尖又行二十五里至碾伯縣東關渡河至鳳山
書院稅駕

十四日已初發過大峽停輿流覽山水之勝如展異書百讀不
厭共行三十里至高店茶尖又行十里西甯縣張成周自城
來迓又十里至平戎驛宿

十五日辰刻發三十里紅莊尖飯後行十里過小峽西甯府慶

潤溥太守自城來逕經武定關過風神壇又行二十里至西甯郡城城中文武皆出逕既進城至貢院遣蔣蔭庭馬隊歸稿以六金恐不足備薪芻也

十六日己刻謁廟

廿七日發落生童畢

廿九日辰刻發三十里紅莊尖又三十里平戎驛宿

三十日辰刻發過大峽吳筱階大令自礪伯來逕即宿礪伯縣城關

十一月

初一日辰刻發筱階送至老鵝堡宿

初二日黎明即發水溝驛尖馬蓮灘宿

初三日來時宿新店子窮鄉瘁苦民居狀隘僕馬頗多不無騷

援故今日丑刻即起籠燈行十里晨熹始透八十里新店子
尖又六十里平番縣宿共行一百四十里仍取道小沙溝自
峻阪馳下山徑之險如行蠶叢道中

初四日雪登程時已加午南大通驛尖紅城堡宿殘雪滿途泥
滑如油薄暮始到

初五日微雪晨刻發三十里鹹水河尖四十里俞家灣宿今日
名為七十里實有九十里滑澁難行過苦水驛驛夫例應換
班而寂無一人以致深昏始到

初六日黎明即發朱家井尖飯後出沙溝口經二十里鋪十里
店周鄉絡繹迤於道左各屬教官均迤於金城關首縣李大
令迤於官廳即進城回署

廿七日作七古一首題甘涼兵備道白午齋前輩鞠花長幅

三十日燈下作五古二首答李凝叔刺史即步其韻

十二月

初一日晨刻 文廟拈香

初三日易式皆轉呈古浪縣舉人馬文蔚甘肅地理考山川脈絡頗有條理論俄志在外回惠在內亦有深語有心人也為題數語於首而歸之

初七日聞卽抄升吉甫中丞調補察哈爾都統升中丞清廬忠正能持大體不避權貴輒直敢言在近時臺臣中不獨旂負之委蛇卽南皮項城兩公一以學問見推一以幹略自負然皆亂世之能臣有安社稷臣者以安社稷為悅非公無足當之卒以直道不容於權倖不能不為朝廷惜也

十二日燈下補語石一通

十五日補語石二通

十九日補語石一通

廿九日夜為幕中諸君子錢歲不過餽餘而已明旦朝賀和衣而卧百緒紛來積憂填膺亦不能交睫矣

女夫王立勛謹繕印

綠督廬日記抄卷十一

邑後學潘承明謹校

緣督廬日記抄第十一冊校勘表

葉次	行次	格次	誤	正	葉次	行次	格次	誤	正
一	六	十五	賀嵒帥	(衍文)	三十二	二十七	二十四	右	石
又	十三	十五	縣	鄉	三十九	九	十四	水	山
九	九	十	五	(衍文)	四十四	二十三	十一	即	師
十	十四	十九	發	登	五十五	十七	六	右	石
十五	二十三	二十一	州	川	六十二	十二	十四	夫至	至行
二十一	二十三	一	以	(衍文)	六十五	一	四至六	得新彊	府經歷
二十三	十四	二	四	西	又	又	八至十	方伯書	長林來
二十八	三	九	十	歸署	又	八	五之四	脫七字	王午奉大
二十九	二	九	從	從	七十	十一	卓前	脫五字	清勵樓二里
三十一	二十二	十六	三	二					